

## **Hibru Imboma Pipia Topa Tirimu Ungumu Hibru I Ungu Torumumunga Ungu Pulu Mare**

Imbomani i pipia torumu iyemunga imbi naa liko manjirimele.

I pipia torumu iyemuni Jisas yu oi imboma kinye enselemanga olandopa moromo iyemu nimbe mane tirimu. Jisas kau melema palinga olandopa moromo iyemu lipo manjemili nimbe i pipia topa panjirimu. Israel imbomanga Gote popo tondoli uluma pali Jisas yuniaku uluma ara tipe pora tirimu. Yunge terimu ulumu Israel imbomanga uluma pali ongondorumu.

I ungu kambu torono wali oi teringi uluma liko manjikolio Jisas yu kau ulu tukumemu terimu ningo yu imbomanga kinye melemanga pali olandopa iyemu ningo ipuki tieni nipili!

## **Mulu Kombuna Enselema Mandopa Moromele, Jisas Olandopa Moromo Ungumu**

*Kinye, Gotenga Maloni lino Gotenga unguma nimbe tirimo*

<sup>1</sup> Paa koro oi Goteni waliwalima lino Hibru imbomanga ara kae kamendo yunge ungu nimbe mundulima ningo tiringi profet iyemani yunge ungu mane tirimuma pilkolio linonga ara kae

kame ninggo tiengei nimbe lipe mundurumu. Imboma paa pilengei nimbe lipe tapondorumu wali kano iyemani ulu awini liko ondoko ungu awini ninggo tiringi.

<sup>2</sup> Nalo i peyalime waina Gote Yunge Maloni lino yunge unguma nimbe tindipili nimbe maina manyendo lipe mundurumu. Aku Ungulumu Goteni nanga melema kamukumu yu timbo, lipe noipe molombalo nimu ungulumu. Kano Ungulumu yu Goteni oi mulu mai melema tembo nimu melema pali terimu iyemula.

<sup>3</sup> Enamu pa teremo mele aku tepa Malo pa teremo akumuni Gotenga pa enge nimbe teremo pa telimu lino lipe ondorumu. Gote moromo mele Malo aku tepa moromo. Malonga ungu engemuni melema pali tepa enge tirimo. Yuni linonga ulu pulu kerima ombo mainye pupili, lino imbo kalaro naa mololima molangei nimbe kongono tepa pora tipelie melema pali nokombaindo mulu kombuna Iye Nomi King Awili Olandopamunga imbo kindo pumbe moromo.

*Gotenga Malo paa olandopa moromo, enselema manyendo moromele aku ungumu*

<sup>4</sup> Aku terimuna Lapani yu nanga Malo imbi tirimunaaku imbi mololimu paa olandopa ltemo, mulu kombuna enselemando imbi lepa Gotenga kongono tendeli iyema nimu aku imbimu paa mainye, aku tepa mele yu paa olandopa enselema yunge maindo moromele.

<sup>5</sup> Goteni nimbeindo:  
Nu nanga Malo, kinye na nunge Lanie, (*Sng 2:7*)

nimu mele ensel tendo walite aku tepa nimuya?  
 Aku molo. Yunge Malondo kau aku ungu nimu.  
 Molo yuni nimbeindo:

Na yunge Lapa molombo, yu nanga Malo molom-  
 balo,  
**(2Sa 7:14)**

nimu akumu ensel tendo nimuya? Aku molola.  
 Malondo kau aku ungu nimu.

**6** Yundo ungu te kape nimula. Yunge ungulu komomu maina lipe manyendo mundupelie Goteni yunge enselemando nimbeindo:

Ungulumu kapi ninggo yunge imbi liko ola  
 mundeio,  
**(Lo 32:43)**

nimu.

**7** Enselema teremele ulu lipe manjipelie i tepa nimbe peremo:

Yunge enselema poporomemu mele molko,  
 yunge kongono tendeli iyema tipe mele  
 moromele.  
**(Sng 104:4)**

**8** Nalo Goteni Malondo nimbeindo:

Awilimu, nu waliwalima iye nomi kingimu morono mele molko kau punio.

Nuni ulu tumbi nilima teko imboma nokonio.

**9** Nuni ulu pulu tumbi nilima undukana konopu mondorono.

Ulu pulu kerima konopu naa mondoko paa naa tereno,  
 akumunga nunge Goteni nu iye nomi king molko  
 melema pali nokani nimbe kanopa lipelie  
 nunge imbomanga pali imbi paa olan-dopamu nu tirimu.

Nu aku tepa tepa kondorumumunga imbomanga  
 pali tono koromele mele

Goteni nu tepa tono kondombalona nu paa olan-dopa tono kolonio, *(Sng 45:6-7)*

nimu.

<sup>10</sup> Goteni Malondo ungu te peya nimbeindo, Awilimu, oi pulu polko nuni maimu enge nimbe lepili teko, nunge kimuni mulumu kinye akuna ltemo melema kinye wamorunu.

<sup>11</sup> Aku mele talo pora nimbelo, nalo nu waliwalima molko kau puruno.

Wali pakolima pingi pumbe tungu nimbe keri ltemo mele mulu mai talo aku tepa bembo nimbelo.

<sup>12</sup> Imbomani wale pakoli tulema toko ltengeindo kimburumele mele nuni mulu mai talo aku teko kimbunio.

Wale pakoli te lupe panjingeindo kolo wangoromele mele nuni aku teko aku mele talo kolo wangonio.

Nalo nu nunu aku teko alowa naa teko, morono mele wali walima molko, waliwalima molko kau punio, *(Sng 102:25-27)*

nimu.

<sup>13</sup> Goteni oi walite nimbeindo, Nunge opa pulema nuni nokani nimbo pele eno topo mainye mundumbo kani i teli oi nu na kinye peya kopu tepo iye nomi talo molambili

nanga imbo kindo ongo molani, *(Sng 110:1)* nimu aku ungumu ensel tendo nimuya? Aku molo.

<sup>14</sup> Aku ungumu enselemando naa nimu lemo enselema naimeleya? Enselema mini mele molko Gotenga kongono tendelima. Akuma Goteni yu

peya kamukumu kopu tepo molamili waio nimu imboma liko tapondoko nokangei paio nimbe lipe mundurumo enselema.

## 2

### *Goteni lino tepa limbelo aku ulu awilimu*

<sup>1</sup> Manda, Jisas yu imbi lipe olando moromomunga ungu tukume oi pilerimuluna ulu teni lino wendo lipe mepa naa pupili nimbolio aku ungumu konopu kimbo tipo enge nimbo ambolopo molamili.

<sup>2</sup> I ungu liko manjeio. Goteni oi linonga ara kaue kame kinye ungu nimbe panjipe mi lerimu ungumu eno nokorumu wali Goteni linonga ara kaue kame ungu mane Mosesini tipili nimbe enselemani Moses ningko tieio nimu. Yunge ungu mane ningima enge nimbe perimuna kano ungu manema naa pilko toko tangondoringi imboma teko kenjiringimunga mele pundu torumuna ltingi.

<sup>3</sup> Nalo kinye Goteni Jisas lipe mundurumuna lino lipe tapondopa mindili naa nangei, na peya molamili nimo ulu akumu paa olandopa. Goteni lino kinye lipe tapondombaindo tepa limbelo ulu paa olandomu tiye kolomolo lemo pele lino ulu pulu keri teremolomanga ambe tepo kowa pumbo mindili naa nomoloya? Kowa paa manda naa pumolo. Goteni lino tepa limbelo mele ungu akumu oi kumbe lepa Awili Jisas yuni yunu nimbe tirimu kinye pele aku ungu nimumu pilerengi iyemani yando linondo i ungumu paimbo ungumu ningi.

**4** Aku wali Goteni kano iyema engema tirimu kinye enoni imboma mongoni kanoko konopu kimbo tingei ulu enge nilima teringi. Goteni Mini Kake Telimunga engemu lipe yunu konopuni pilipelie kongono molo ulu lupe lupema tenge engema ungu ningo tiringi imboma moke tepe tirimu. Goteni Malonga ungu tukumemu paimbo ningo pilengei nimbe kano iyema enge tirimu.

*Goteni Jisas Yu yunge angenupilima mele molopili nimu ungumu*

**5** Mai koinjo te wendo ombalo nimolo aku maimu Goteni nokangei nimumu enselemando naa nimu.

**6** Aku molo. Gotenga bukuna imbomani mai al-topa wendo ombalomu nokongema ungu te topa panjipelie nimbeindo,

Gote, nuni lino imboma ambele melema konopu lekolio lino kanoko imbi tirinoya?

Maina imbomani meremele imboma ambe temona nuni kondo kolko nokoronoya?

**7** Nuni imbomando nini, imboma enselemanga alaye kolo mainyendo molangei nimbo ninu.

Pele nuni enonga imbima liko ola mundunduko, imbima tiko,

**8** enoni melema pali nokangei ninu, (*Sng 8:4-6*) nimbe moromo. Goteni maina imbomani melema pali nokangei nimu bukuna moromo lemo Goteni mele terimumanga tendekure kape enoni naa nokangei nimu mele te paa naa ltemo. Nalo imbonani melema pali nokangei nimo nimbe moromo mele, kinye aku tepo nimbo naa karomolo.

**9** Aku paimbo nalo kinye maina iye tendeku paimbo yunge imbi melemanga pali paa olando moromo nimbo karomolo. Akumu Jisas. Oi Goteni lino we kondoloko lipo tapondombai enonga waye kolo wangopa mindili nomba kolopili nimbe yu enselemanga mainye mele molopili nimu. Yu mindili nomba kolorumumunga Goteni yu melemanga pali imbi olando tipe yunge imbi lipo ola mundurumu nimbo karomolo.

**10** Akumunga ungu te peya nembo. Goteni melema pali terimu. Yu melemanga pali Gote. Yunu pilipelie melema terimu, akuma kinye nokoromo. Akumunga imbo awini kanopa lipo nanga bakuluma molko, na kinye peya popo tipo molamili nimu kinye eno lipo tapondopa Gote kinye molko kondonge aulkemu akirindirimu iyemu mindili nopili nimu aku paimbo nimu. Yu mindili norumumunga yu iye paa penga tumbi nilimu molopa eno lipo tapondopa mulu kombuna punge aulkemu lipo ondombai mepa purumo.

**11** Yuni Gotenga bakulu awini manda mulu kombuna mepa pumbelomunga pulumu i tepe: Yu kinye eno lapu tendekumu. Iye teni imboma lipo tapondopa Goteni kanopa yunge imbo kake telima nimbe kanopili nimo iyemu kinye kano iyemuni imboma lipo tapondoromona eno Goteni kanopa nanga imbo kake telima nimbe karomo imboma kinye linonga Lapa tendekumu. Akumunga yuni enondo ango kame nimbeindo pipili naa koromo.

**12** Akumunga oi ungu te nimbeindo,

Gote, nu morono mele nanga angenupilindo nimbo timbo. Eno kinye peya nu popo tomilindo maku topo molomolo wali eno pilko molangei kunana nimbo nu kapi nimbo,

(*Sng 22:22*)

nimu.

<sup>13</sup> Akumunga kelepa walite yuni ungu te nimbei, Nanga ango kameni teremele mele nani aku tepo Goteni na nokombo nimu mele paimbo tembalo nimbo pilipo taka lipo molombo, nimu. Akumunga ungu te peya nimbei,

Goteni na bakulu tirimuma kinye peya moromo, (Ais 8:18)

nimu.

*Jisas lino lipe tapondombaindo maina imbo iye apuwe lerimu ungumu*

<sup>14</sup> Bakulumando nanga ango kame nimu akumu maina imbomando nimu, akumunga Jisas yu eno mele molambo nimbe maina iye apuwe lepa molorumu. Enonga nimbo kolopolio kololi ulu pulumu nokromo iyemu topo mainye mundembo nimbeline aku tepa maina iye apuwe lepalie kolorumu. Kololi ulu pulumu nokromo iye akumu kuromanga awili Satan.

<sup>15</sup> Kolomolo ninggo waliwalima konopu kimbo tiko pipili kolko kau moromele imboma aku teko Sataneni eno tepa pipili kondopa ka ulkena mele panjirimoma wendo liembo nimbe Jisas kolorumu.

**16** Jisasini aku tepe terimu akumu enselema lipe tapondombaindo paa naa terimu nalo Abrahameni kalopa ltimu imboma lipe tapondombaindo terimu nimbo piltimolo.

**17** Aku tepalie yunge angenupilima maina moromele mele yu aku tepe maina molopa eno umbuni teremo molo mindili noromele aku tepe uluma pali yu kinye wendo opili maina iye apuwe lepalie aku uluma tendeku tipe teremo. Goteni imbomanga ulu pulu kerima tiye kolopili yu kinye popo tiko molonge kongonomu tembaindo maina ombo iye aku tepe molopalie yuni imbomanga kondo kolopa Gote popo tondoli iye nomi awili olandomu molopa Gotenga kumbe kerena aku kongonomu enge nimbe ambolopa molombalo aulke te lupe naa ltemo.

**18** Yu kinye manda manjili ulu awini wendo ombo, mindili norumu akumunga imboma kinye manda manjili uluma wendo oromo kinye yuni manda eno lipe tapondoromo.

### 3

#### *Mosesinga imbimu olando nalo Jisasinga imbimu paa olandopa purumo ungumu*

**1** Ango kame, na kinye peya Kraistinga imbo moromelema, mulu kombuna moromo Goteni eno kape kanopa lipe nanga imboma molangei nimo imboma aku nio ungumu ungu paimbomu kani Jisas moromo mele paa konopu kimbo tiko molangei. Yu Goteni kongono tendepuwi nimbe lipe mundurumu iyemu, akumu Gote Popo Tondoli Iye Nomi Awili Olandomu. Aku iyemu

paimbo nimbo yu moromo mele imboma temane topo tirimolo akumu wamongo pileio!

<sup>2</sup> Oi Mosesini Gotenga imboma nokopalie Goteni tewi nimu mele pilipe tumbi tipe tepe ungu te tiye naa kolorumu. Aku tepala Goteni Jisas kanopa lipe kongono tipe tewi nimu mele pilipe tengen tipe terimu. Gotenga imboma yunge ulkemu mele.

<sup>3</sup> Ulke takoromo iyemu yunge imbi olando moromo, yu paa kapi nimele. Ulkemunga imbi olando naa moromo. Aku tepe mele iye Jisas ulkemu takorumumunga yunge imbimu paa ola molopili nimbo yu paa kapi nimolo, nalo iye nomi Mosesinga imbimu ulke mele olando naa moromo.

<sup>4</sup> Ulke te we wendo naa ombo angimo. Imbo teni ulke te takoromo kinye angimo. Nalo Goteni melema pali lepili nimuna moromele.

<sup>5</sup> Moses yu Gotenga kongono tendeli iyemu molopa Goteni tewi nimu mele paa pilipe lipe Gote yunge ulkena kongono tembaindo tiye naa kolopa kongono tepe kau molorumu. Yunge kongono terimu i tepe: Goteni pele nimbe timbelo mele Mosesini oi nimbe tirimu.

<sup>6</sup> Nalo Kraist yu Gotenga Malo molopa imboma Gotenga ulkemu moromelema yuni nokopa Goteni tewi nimo mele paa pilipe lipe kongono tembaindo tiye naa kolopa kongono tepe kau moromo. Jisasini lino lipe tapondombalo nimbo enge nimbo pilerimulu mele tiye naa kolopo, konopu enge nipili paimbo aku tembalo nimbo enge nimbo pilipo pipili naa kolopo, konopu tipo nokopo molomolo lemo lino yunge ulkemu moro-

molo.

*Gotenga Ungumu tui tinge imboma mandoko naa molonge*

<sup>7</sup> Lino Gotenga imboma aku tepo moromolomunga Mini Kake Telimuni nimu ungumu oi topa panjirimumu pilemili! Yuni nimbei,

“Goteni nimu ungumu kinye pilinge lemo

<sup>8-9</sup> oi enonga ara kae kameni kombu ku lelina  
Goteni mumindili kolombalonje ning  
ungu niuma paa naa pimolo ning tui  
tiringi ulu naa teaio.

Akuna poinye tu paono ombo pupili eno kanoko  
molangei nani eno lipo tapondambo nimbo  
ulu enge nili mare teru,

nalo kanokolio Goteni lino ulure tembalonje  
manda manjipo kanamili ning

nanga ungumu naa pilko tui tiko, nani eno  
nokambo ungu naa ningi.

<sup>10</sup> Akumunga nani kano imboma kinye paa mu  
mindili kolopolio nimboindo,

i imboma nani ungu nioma naa pilko tui ning  
enonga aulke mako tondoruna naa pungo  
tiye koromele.

<sup>11</sup> Eno kinye mumindili kolopolio mi lepo nim  
boindo, nani konopu taka lipe u nipili  
molangei niu ulu pulumu eno paa naa linge  
nio,” nimu. *(Sng 95:7-11)*

<sup>12</sup> Nanga ango kame, enonga imbo teni ulu pulu  
kerima teambo nimbe konopu lipe mundupe yu  
Gote nimu mele paimbo nimbe ipuki tirimu mele

tiye kolopalie imboma enge nimbe nokoromo engemu peremo Gote umbulu timbelo kani kanoko kondoko molaio.

<sup>13</sup> Aku ulu naa tekolio i teko teangei. Ulu kerimani lino kondi topa eno none teangei nimbelo kani imboma nendo yando konopuma enge tipili ningko liko tapondangei. Goteni "Kinye" nimu akuna olando tondu akumu linoni waliwalima kinye uluma manda temolo, kinye manda ipuki timolo nimbo aku walimanga aku tepo nimbo pilipo nendo yando imboma ungu pengama nimbo tiemili.

<sup>14</sup> Aku niomunga pulumu i tepa: Lino Gote oi pulu polopo ipuki tirimulu mele aku tepo kamukumu paa enge nimbo ipuki tipo ambolopolio kolomolo lemo lino Kraistinga imbo tukumema molomolo.

<sup>15</sup> Lino i tepo lipo manjirimolo. Neya aku ungumu we ltemo. Akumu i tepa:

Goteni nimu ungumu kinye pilinge lemo oi enonga ara kaue kameni kombu ku lelina Goteni mumindili kolombalonje ningko ungu niuma paa naa pimolo ningko tui tiringi ulu naa teaio. *(Sng 95:7-8)*

*Kinye Goteni nimu ungumu pilinge lemo oi enonga anda kolepalemani kalambo naa ningko yunge ungu nimuma paa naa pimolo ningko tui ningi mele naa teaio nimu kanomu*

<sup>16</sup> Naimeleli oi Goteni ungu nimuma pilkolio naa pilimolo ningko eno none teringiya? Aku imbo Mosesini Isip kombuna wendo lipe mepa purumuman kau aku ulu teringi.

<sup>17</sup> Poinye 40 omba pupili Goteni naimele kinye mumindili kolopa molorumuya? Ulu pulu keri tekolio kombu ku lelina koloringi onoma akuna lepili tiye koloringi imboma kinye mumindili kolorumu.

<sup>18</sup> Na Goteni konopu taka lipe pepili molangei niu ulumu enoni paa naa linge mi lepo nio nimu akumu naimelendo nimuya? Aku ungumu yunge ungu naa pilimolo ningko eno none teringi imbomando kau nimu.

<sup>19</sup> Aku imbomani Gote ipuki naa tiringina aku pulumunga Goteni eno mepo pumbo nimu kombuna naa mepa purumu akumu lipo manjirimolo.

## 4

### *Gotenga imboma konopu ame toli peli mulu liko molonge ungumu*

<sup>1</sup> Akumunga Goteni lino imbomando konopu taka lipe pepili mulu liko molangei nimbo kombuna mepo pumbo oi nimbe panjirimu ungumu, kinye kape we peremo kani yuni enonga imbo te moke tepa kanopalie konopu ame topili mulu liko molangei niu ulumu naa lipili nimbelo kani pipili kolko molaio.

<sup>2</sup> Ambe temona aku nimbo pipili kolamiliya? Oi linonga ara kaue kame Mosesini kombu Isip tiye kolopa wendo lipe mepa purumu kano imboma temane pengamu pileringi, aku mele lino ungu tukumemu pimolola. Nalo kano imboma aku ungumu pilkolio Goteni paimbo nimo ningko ipuki naa tiringimunga ungu pileringimuni eno lipe naa tapondorumu.

<sup>3</sup> Lino Gotenga tembo nimo mele paimbo tembalo nimbo ipuki tirimulu imboma kau, kinye paimbo Goteni konopu ame topili molangei nimbe nimu ulu pulumu manda limolo. Oi Goteni nimu mele aku tepa peremola. Oi yuni nimbeindo,

Eno kinye mumindili kolopolio mi lepo nimboindo, nani konopu ame topili mulu liko molangei niu ulu pulumu eno paa naa linge, *(Sng 95:11)*

nimu. I ungumu oi Moses molopili wendo orumu. Oi Goteni mulu mai melema terimu aku kongonomu tepe pora tirimu wali aku koro mololi ulu pulumu perimu.

<sup>4</sup> Gotenga bukuna ungu te moromo mele pilipelie ungu akumuni wali kite yupoko pakera tipemundo nimbei,

Wali kite yupoko pakera Goteni kongonoma tepe pora tipelie koro molorumu, *(Stt 2:2)*  
nimbe moromo.

<sup>5</sup> Koro molorumumunga ungu te peya nimu akumu i tepe: Nani konopu takalipe pepili mulu liko molangei niu ulu pulumu eno paa naa linge nimbe moromo.

<sup>6</sup> Aku ungumuni lino lipe ondoromo mele i tepe: Gotenga konopu takalipe pepili mulu lili ulu pulu oi perimu akumu kinye we peremo akumunga kinye imbo mare aku konopu takalipe pepili molonge ulu pulumu linge. Nalo Mosesini mepa purumu ara kae kame temane pengamu pilkolio kalambo naa ningungumu naa pilko likolio neya akuna naa puringi.

<sup>7</sup> Oi eno konopu taka lipe pepili koro naa moloringimunga poinye awini om̄ba pupili pele walite Goteni altopa iye nomi king Devitinga kerenia altopa ‘Kinye’ nimu. Devitini oi nimu nio kanomu i tepa,

Goteni nimo ungumu kinye pilinge lemo Yunge ungu paa naa pimolo ningi tui tiringi ulu naa teaio. *(Sng 95:7-8)*

‘Kinye’ nimu akumunga pulumu i tepa, Goteni altopa wali te kanopa lipelie i walimu konopu taka lipe pepili mulu lili walimu nimbe nimu.

<sup>8</sup> Josua yuni linonga oi ara kae kame mulu liengei nimu lemo aku Goteni mulu lili wai te altopa naa nimbelo.

<sup>9</sup> Akumunga Goteni yunge imbomando konopu ame topili molangei nimo ulu pulumu kinye kape we peremo. Aku koro mololi ulu pulumu Goteni mulu mai talo kinye melema tepa pora tipelie, wali yupoko pakera tipemunga Sabat walina koro molorumu aku tepa mele peremo.

<sup>10</sup> Lino lipo manjirimolomu i tepa, oi Goteni yunge kongono tepa pora tipelie mulu ltimu mele imbo te yunge kongono tepa pora tipelie aku tepa mele mulu lipe taka lipe molombalo.

<sup>11</sup> Oi imbomani Goteni i teko teaio nimu ungumu pileli naa pileli none teringi. Aku tekolio taka liko mulu lili ulumu naa teringi. Lino aku ulu naa teamili nimbolio Gote kinye mulu liemili enge nimbo ipuki tiemili.

<sup>12</sup> Goteni nimu ungumu we naa moromo. Yunge ungumu koinjo mololi uluma tepa enge tirimo nimbo pimolo. Yu nee paa noromo, opa teli bainet nendo kinye konondo kape waye talonga nee

noromo aku manyendo, yu paa olando. Gotenga ungu muni opa teli bainet mele ombele mu kinye kiki memu kinye tumbi tipe topa turu topa min imu kinye konopumu kinye topa turu toromo. Aku te pa lino konopu kimbo tirimolo mele kinye, konopuna pilipo temolo konopu Itemolo mele kinye, pali pilipe moke teremo akumunga yunge ungumu tengen tipo ipuki tiemili.

<sup>13</sup> Goteni mele terimumanga pali te Goteni naa kanopili ningi manda lopeke naa tengen. Melema pali tapuwe nimbe Gotenga kumbekerena mona Itemo. Aku mele Goteni linonga ulu teremoloma pali pilipe moke tembalo konopu lepolio yunge ungumu pilipo teamili.

### **Jisas Gotenga Kumbe Kerena Linonga Popo Tondoli Iye Kiyendomu Moromomunga Ungumu**

<sup>14</sup> Manda, linonga mulu kombuna Gote moromona purumu Gote popo tondoli iye kiyendo, akumu lino oi lipe tapondorumu iye Jisas, Gotenga Malo. Kinye yuni lipe tapondoromo mele aku te pa paimbo tembalo nimbo ipuki tipolio nimbo para tirimolo mele tiye naa kolopoaku te po ingi tipo ambolopo molamili.

<sup>15</sup> Kuro kerimanga nomi Sataneni lino konditoromo kinye molo nimbo ulu pulu kerima topo mainye mundumolo enge naa pepili moromolo wali linonga popo tondoli iye kiyendomuni kanopa naa kondo koromoya? Yu kanopa kondo koromo. Sataneni lino ulu lupe lupema pali kondi

toromo mele oi aku tepa linonga popo tondoli iye kiyendo Jisas kondi torumu nalo ulu pulu kerimanga te naa terimu.

<sup>16</sup> Akumunga, lino Gote moromona pipili naa kolopo nondopo pumbo yunge kumbekerena yu kinye konge nemili. Aku temolo wali Goteni lino kandiki tepa umbuni teremona wendo lipe tapombalo.

## 5

*Linonga popo tondoli iye kiyendo Jisasini lino molopo kondamili nimbe lino manda tepa wendo limbelo ungumu*

<sup>1</sup> Wali wali Juda imbomanga ningi Gote popo tondoli iyemanga iye te popo tondoli iye kiyendomu molopili ningi, kanoko liko kongono tepili nimele mele i tepa. Goteni maina imbomanga iye te kanopa lipelie yu Gotenga kumbekerena yunge kongono tendepa maina imboma lipe tapondopili nimo. Popo tondoli iye kiyendomu yuni imboma lipe tapondombaindo imbomani Gotendo paa tereno ningi tirimele mele lupe lupema yuni lipe Gote tindipe, imbomanga ulu pulu kerima tiye kolondopili nimbe kongi kera melema Gote popo topa kalopa tirimo.

<sup>2</sup> Aku Juda imbomanga Gote popo tondoli iye kiyendomu yu kape maina iye tela. Goteni teaio nimo unguma pilipe lipe tembaindo yu umbuni peremola, akumunga imboma Gotenga unguma pilko tune tane ningolio yunge aulkena loi leko moromele imboma kondo kolopa lipe tapondoromo.

<sup>3</sup> Wali mare yu yunu kape Goteni teao nimu mele naa teremola. Akumunga imbomani ulu pulu keri teringimanga popo tondopa melema kalopa Gote tirimo aku mele yunge ulu pulu kerima tiye kolondopili nimbe popo topa kalopa tirimola.

<sup>4</sup> Gote popo tondoli iye kiyendomunga ungu te peremola. Iye teni yunu nanga imbimu ola molopili, popo tondoli iye kiyendo molambo naa nimo. Oi pulu polopa Goteni Aron kanopa ltimu mele aku tepe yandopa yandopa kape kanopa lipe aku kongonomu tewi nimo iyemu kau aku kongonomu teremo.

<sup>5</sup> Aku tepe mele Kraist yu kape yunu nanga imbi ola molopili kani popo tondoli iye kiyendomu molambo naa nimu. Goteni yu imbi ola molopili nimbeline nimbeindo,

Nu nanga Malo, kinye na nunge Lanie, (*Sng 2:7*)  
nimu.

<sup>6</sup> Buk tengi Goteni ungu te peya nimbeindo,  
Melkisedek molorumu mele nu nunu aku teko  
Gote popo tondoli iye te waliwalima molko  
kau punio, (*Sng 110:4*)  
nimu.

<sup>7</sup> Kraistinga ungu te i tepe. Jisas ya mai kombuna molopalie nimumuni, Goteni tewi nimu mele takalipe pilipe lipe tepe yunge imbi mainye molopili nimbeline yu kolombalo aulkena manda wendo limbelo Gote kinye ungu nimbe enge nimbe walipe pilipe kola tepe konge terimu kinye konge terimu mele Goteni pilerimu.

<sup>8</sup> Paimbo yu Gotenga Malo nalo yu mindili norumu akumuni yu Goteni tewi nimu unguma

pilipe lipe tengen tipe tembalo mele pilerimu.

<sup>9</sup> Aku tepa terimumunga yu Goteni tewi nimo unguma paa toya topa pilipe lipe tepa, kongono timbeloma paa tepa kondombalo iyemu molopalie, yunge ungumu pilko liko tengen tiko teremele imboma lipe tapondopa eno kamukumu molko kondonge ulu pulumu peremo iyemu moromo.

<sup>10</sup> Aku tepa tepa molombalo iyemu molopili kani popo tondoli iye kiyendomu molopili nembo nimbe Goteni yundo iye Melkisedek popo tondoli iyemu molorumu mele nu aku teko popo tondoli iye kiyendomu wali wali molko kau pani nimbe kanopa ltimu.

## **Lino Altopo Molopo Naa Kenjimili Ningo Nokoko Kondaio Nimu Ungumu**

<sup>11</sup> Jisas yu Melkisedek popo tondoli iyemu molorumu mele popo tondoli iye kiyendomu moromo mele ungu awini we peremo nimboindo nani kape perero. I ungumunga ungu pulumu paa enge nilimu. Nimbo tilka nalo eno ungu awini nimbo tiroma pilengeindo mindili kolko naa pimelemunga i ungu niomunga ungu pulumu eno nimbo timbo mele pinyewe toromo.

<sup>12</sup> Eno paa koro oi Kraistinga imboma moloringi, akumunga kinye eno Gotenga unguma mane tili imboma molko imbo mare mane tilimala nalo eno Gotenga oi pulu polko ungu pulu oi kumbe leko pileringima wamongo naa pimelemunga imbo teni eno mane tiembo nimbeline Goteni Kraist maina lipe mundurumu,

Yu linonga nimbe kolo wangopa kolorumu ungu akuma kau altopa manda mane timbelo kinye pilingenje ungu enge nilima manda mane naa timbelo. Naa pilimala. Eno bakulu pamema mele ame kau noromele, langi enge nilima manda naa noromele.

<sup>13</sup> Ame kau noromele bakuluma enonga teremele uluma naa liko manjirimele. Uluma oi naa teli akumunga temu ulu toya tolimu, ulu temu ulu kerimu moke naa apurumele.

<sup>14</sup> Nalo langi enge nili akuma imbo yuman i kau noromele. Imbo mare oi ulu teringina wamongo kanoko pilkolio i ulu pengama, i ulu kerima ningi moke teko pilko moromelema kau langi enge nilima manda noromele.

## 6

*Jisas tiye naa kolopo Goteni lino tepa kondopili nimbo konopu enge pepili nokopo molamili ungumu*

<sup>1-2</sup> Manda, Kraistinga imboma i teko i teko teremele ungumu oi pulu polko ningi tiringi ungu akuma kau naa nimbo molamili. Linoni aku tepo kau nimbo molomolo lemo ulke ponga awinima poltomolo nalo ulke oi naa takoli mele. Oi kumbe leko ningi tiringi unguma i tepa mele: Te, kololi ulu pulumu kau peremo uluma pali umbulu tiko konopu topele toko Gote ipuki tirimele. Te, no lingeindo no ltimelemunga ungu pulu awini nimele. Te, Goteni mane tipili ningi imbomanga pinyewena ki noirimelemunga unguma. Te, Imboma kolkolio makilinge ulumunga ungu awini nimele. Te, Goteni maina imboma kot tendepa

pilipelie imbo mare molko kondoko kau pangei nimbe, imbo mare molko kenjiko kau pangei nimbelomunga ungu mane tirimele unguma. Aku ulumanga unguma kau ningo pilko naa molangei. Imbo yuma ungu manema pimele mele aku tepo pilipo molamili.

<sup>3</sup> Manda, Goteni yunge ungumanga ungu paa tukume pilemili linondo ee nimo lemo, aku ulu teamili.

<sup>4-6</sup> Akumunga kinye ungu enge nili mare nemili. Goteni Kraist lipe mundurumu kinye yuni omba tenderimumunga pulumu pilko kondoko paimbo ningo pilko limele imboma mulu kombuna mele we tipe kalopa tirimo melema liko, Mini Kake Telimu konopuna liko, Gotenga ungumu oi pilko likolio aku ungumu paa penga ningo pilko, Gotenga engemuni pele kombu pora nimbelo walimunga ulu enge nilima tembalo aku engemuni kinye ulu enge nilima teremo uluma kanoko, aku uluma pali tekolio altoko konopu alowa teko naa pimolo ningo Kraist tiye kolonge lemo kelko manda konopu alowa teko Kraistingu unguma paimbo ningo enge ningo pilko yando onge aulke te paa naa ltemo. Imbo teni aku tepe teremo aku ulumuni Gotenga Malo altopa kolopili nimbe unjo polopeyana pirimu topa uku topa, imbomani yu kanoko ungu tako tondongei nimo.

<sup>7</sup> Pileio! Lo toromo kinye maina no awini pumbe, aku maina poine teremele imbo mani langi manda liko nonge langima omba kondoromo kinye Goteni aku tepe kano maimu tepe kondoromomunga aku teremo.

<sup>8</sup> Nalo mai tenga tiri ka kinye era keri lupe lupe oromo kinye kano maimu mai keri. Goteni keri lepili nimbei teremo. Pele wali te mai akumu tipeni undukana nombalo.

<sup>9</sup> Nanga ango kame, Kraistainga imboma molkolio pele yu tiye koromele imbomando aku tepo nimolo nalo eno aku teko naa tengenimbo pilipo moromolo. Goteni eno lipe tapondoromo, molko kondoko kau punge uluma teko moromele konopu itemolo.

<sup>10</sup> Goteni ulu tumbi nilima kau teremo. Enonga kongono teremelema kinye, eno Gote konopu mondokolio yunge imboma liko tapondoromele mele kinye kape waliwalima teremele uluma kinye, kanopa keri konopu lepa tiye naa koromo. Pilipe kau moromo.

<sup>11</sup> Eno paliaku teko teremele mele enge ningoteko molko tiye naa kolangei nimbo paa konopu itemolo. Teliko pungo Goteni lino tepe pengatimbelo aku waimu wendo opiliaku teko molaio

<sup>12</sup> Eno tiye naa tepili konopu lepo moromolo. Imbo Gote paimbo ningoi puki tiko tiye naa kolkolio Goteni yunge bakulumaini melema timbonimu melema tirimuna ltingi imboma moloringimele molaio konopu lepo moromolo.

*Goteni tembo nimbe panjirimu mele paimbo  
tembalo nimbo ipuki tirimolo ungumu*

<sup>13</sup> Oi Goteni linonga kolepa Abraham kinye ungu te nimbe panjipelie, paa olando moromo imbo tenga imbi lepa mi lembaindo Gote yu manyendo imbo te paa olando te naa molorumumunga Gote yunu yunge imbi lepa mi lepalie

**14** nimbeindo,

Nani nu mane ungu tipo, nunge kolenale bakulu  
awini molangei nimbo paimbo nio, *(Stt  
22:17)*

nimu.

**15** Aku nimumunga pilipelie Abraham Goteni yu  
mele timbo nimbe panjirimumu ara tipe timbelo  
nimbe oi tiye naa kolopa we nokopa molopalie  
paimbo ltimu.

**16** Imbo teni paimbo nimu ninggo pilengei nimbe  
yunge imbo te awili olando moromomu imbi lepa  
paimbo nio nimbe mi ltemo. Imbomanu yunge  
ungumu toko mainye naa mundundengei nimbe-  
lie mi lepa nimo.

**17** Akumunga aku tepa melela, Goteni Abraham  
kinye nimbo panjiru mele yunge kolepale imbo-  
mani paa pilko kondangei. Nani tembo nimbo  
panjiro mele konopu alowa naa tepo paimbo tero  
ningo kanangei nimbe yunge imbi yunu lepa  
paimbo niu nimbe mi lerimu.

**18** Gote yu konopu alowa naa teremo. Eno  
kinye tembo nimbo panjirimu mele waliwalima  
kapo paimbo tembalu ninggo konopu kimbo tiko  
molangei nimbe i ulu talo terimu. Ulu te, ungumu  
oi nimbe panjirimu. Ulu te, ungumu nimbe pan-  
jipelie pele yunge imbi yunu lepa paa paimbo  
tembo nimbe mi lerimu aku ulu talo terimu. Aku  
ulu talo Gote konopu alowa manda naa tepa, kolo  
paa manda naa toromo ulu talo. Akumu pilipo-  
lio Goteni lino timbo nimbe panjirimu melema  
paimbo timbelo nimbo pilipo umbuni te wendo  
naa opili, lino nokopili nimbo Gote moromona  
nondopo purumolo imboma linonga konopu enge

nipili tiye naa kolopo manda nokopo molomolo.

<sup>19</sup> Aku ungumunga ungu iko te topo tiembo, nona andoli sip te poporomeni nona topa mepa pumbelo ninggo tengga kareko panjirimele. Aku tepe linonga minima sip mele. Goteni lino kinye tembo nimo ungumu kolo naa topa paimbo teremo nimbo pimolo ulu akumu minimanga ka mele tengga kareremo. Aku kamu Gote moromo kiripi paa kake telina, maminye awilini pipi tirimo, akuna tukundo pumbe kareremo.

<sup>20</sup> Kano kiripi paa kake telina iye te linonga nimbe lipe tapondombaindo kumbe lepa tukundo purumu. Pumbelie Melkisedek molorumu mele yu aku tepe waliwalima linonga nimbe Gote popo tondoli iye kiyendomu moromo, akumu Jisas.

## 7

### *Popo tondoli iye paa imbi olando mololi Melkisedekenga temanemu*

<sup>1</sup> Aku iye Melkisedek yu ulke kombu Salem imbomanga iye nomi kingimu molopalie, Gote Paa Olando Kombumanga Pali Nokorumumunga kongono tendembaindo imbomanga Gote popo tondopa molorumula. Oi Abraham kombu tengga pumbe opa tepe iye nomi king mare topa mundupelie eno meringi melema lipe mepa kelepa ulkendo ombai orumu kinye kano iye Melkisedek yu ombo aulkena kanopalie Goteni nu tepe kondopili nimu.

<sup>2</sup> Yuni aku tepe Gote kinye ungu nimbe Abrahamenga konge tenderimu wali Abrahameni 10 10 nimbe lipe merimu melemanga pali te te

nimbe pengama wendo lipe Melkisedek tirimu. Melkisedek yunge imbi pulumu ulu tumbi nilima teremo iye nomi kingimu. Yu nokorumu ulke kombu Salemenga imbi pulumu, imboma kinye ame toli ulu pulumu. Akumunga iyemunga imbi talo tipemu Imboma Kinye Ame Toli Ulu Pulumu Nokoromo Iye Nomi Kingimu.

<sup>3</sup> Melkisedek yunge anumu lapa talonga imbi talo naa lepa, yunge lapali kolepalenga tengah imbi kape naa lerimu. Yu meringi walimu kape, yunge kolorumu walimu kape naa lerimu. Yu Gote popo toli iyemu molorumu mele walite tiye kolorumu ungu te naa peremo. Yu Gotenga Malo waliwaima koinjo molopa kau purumo mele yu aku tepa mele molorumu.

<sup>4</sup> Melkisedek yu imbi paa olando molorumu mele pileio. Lino imbo talape awininga kolepa paa awili Abrahameni opa tepalie melema ltimu. Aku melemanga pali 10 10 nimbe popo tipelie 10 akumunga te nimbe wendo lipe Melkisedek tirimu.

<sup>5</sup> Livaini kalopa ltimu iye mare Gote popo tondoli iyema moloringi. Kano iyemanga ungu mane te peremo, akumu i tepa mele: Israel imbomanga mele 10 10 ninga noinge melemanga te te ninga wendo liko Livai iyema tiengenai nimbe peremo. Melema tiringi imboma kinye Livai iyema kinye angenupili, eno peya pali Israel imboma Abrahameni kalopa ltimu nalo Livai iyemani angenupilinga melemaaku teko mare ltingi.

<sup>6</sup> Melkisedek yu Livaini kalopa ltimu iye te molo nalo Abrahameni Livai imboma oi naa kalopa lipili yunge mele 10 10 nimbe melemanga pali te

te nimbe wendo lipé Melkisedek tirimuna ltimu. Goteni kano iyemu yu kinye tembo nimbe pan-jirimu iyemundo Melkisedekeni Goteni tepe kondopili nimula.

<sup>7</sup> Lino i tepo pimolo. Iye teni Goteni nu tepe kondopili nimo aku iyemu yu iye olandomu, Goteni nu tepe kondopili nimona ltimo iye akumu manyendomu.

<sup>8</sup> Akumunga ungu te peya peremo mele i tepe, Livai iyemani Israel imbomanga mele 10 10 ningó noiringi melemanga te te ningó ltingi iyema koloringi. Nalo Abrahamenga mele 10 10 nimbe merimumanga te te nimbe ltimu iyemu Gotenga bukuna yu kolorumu ungu te nimbe naa moromo.

<sup>9</sup> Linoni Livai iyemani teringi mele ungu te manda nimolo. Aku iyemani kinye melema aku teko ltimele kano nalo oi enonga melema Melkisedek tiringi.

<sup>10</sup> Paimbo enonga kolepa Livai oi naa meringi nalo Livai yunge kolepa Abrahamenga kangina tukundo molopili Melkisedekeni Abraham aulkena kane kane topa kanopalie Abrahameni melema tirimuna ltimu akumunga aku tepe nimolo.

*Oi popo tondoli iye moloringima manyendo,  
popo tondoli iye Melkisedek mele koinjo moromo  
iyemu yu olandomu*

<sup>11</sup> Oi Mosesini Israel imbomando Gotenga ungu manema timbei ungu mane te tipelie nimbei, Livainga lapumuni Gote popo tondoli kongonomu teangei nimu.

Aku teko teangei nimu kinye kano popo tondoli iyemani kongono teringi mele manda terimu lemo kinye Aroni kalopa ltimu popo tondoli iyema mele iye te naa molopili, Melkisedek mele iye te kinye molopili ambe temona Goteni altopa nimuya?

<sup>12</sup> Gotenga popo tondoli talapemu kolo wangoko tengen wali ungu manemu kape kolo wangoko tengen.

<sup>13</sup> Goteni popo tondoli iye nomi awili olandomu kolo wangopa molopa kau pumbelo nimu kano iyemu yu Israelenga malo Livaini kalopa ltimu imbo talapemunga tuku molorumu iye te, molo. Yu Israelenga malo teni kalopa ltimu imbo talapemunga tuku molorumu iye te. Yunge angenupili lapali kape teni Gote popo toko kaloringi alta polona pungo kongono naa terimu.

<sup>14</sup> Linonga Awilimu Israelenga malo Judani kalopa ltimu iyemu molorumu lipo manjirimolo. Aku imbomanga te Gote popo tondoli iye te molombalo nimbe Mosesini oi naa nimu.

<sup>15</sup> Kinye iye koinjo te popo tondopa moromo paa mona ltemona toya topo lipo manjirimolo akumu Melkisedek yu molorumu mele moromo iyemu. Aku iyemuni Livai lapu popo tondoli moloringi akumanga paa olando moromo.

<sup>16</sup> Kano iyemu ungu manemuni Livaini kalopa limbelo iyema popo tondoli iyema molangei nimu akumanga yu popo tondoli iye te naa molorumu, molo. Nalo yu waliwalima koinjo molopa kau pumbelomunga engemu perimumunga yu popo tondoli iyemu moromo.

<sup>17</sup> Goteni yu aku tepa moromomundo oi ungu te

i tepe nimbe panjirimu,

Melkisedek molorumu mele nu aku teko Gote  
popo tondoli iye te waliwalima molko kau  
punio. *(Sng 110:4)*

**18** Aku ungumuni lino i tepe mele lipe ondoromo. Ungu mane oimu pange tepe lino lipe tapondombalo enge te naa perimuna Goteni kano ungu manemu kamukumu mainye pupili nimu, akumu lipe ondoromo.

**19** Mosesini ungu mane tirimumani ulu tukume te wendo opili naa nimu. Akumunga kano popo tondoli iyemanga ungu manemu kolo wangopalie Goteni aulke koinjo penga te lupe akiririmu akumu olando, oi ungu manemu mainyendo. Aku aulke koinjomunga pumbolio lino Gote moromona nondopo manda purumolo.

**20** Goteni Jisas popo tondoli iyemu molopili nimu wali we naa nimu. Yuaku popo tondoli iyemu molopili nimbe paimbo nio nimbe, nimbe panjipe mi lerimu. Oi popo tondoli iye moloringima aku ulu teko molangei nimbe Goteni mi naa lerimu,

**21** nalo Jisas Gote popo tondoli iye te molopili nimbe Goteni paimbo nio nimbe mi lerimu. Yundo i tepe nimbe panjipelite nimbei,

Awili Goteni yunge imbi yunu lepa paimbo nio nimbe mi lepalie nu popo tondoli iye waliwalima aku teko molko kau punio nimbe panjipe mi lerimu.

Yu pele konopu alowa tepe ungu te lupe paa naa  
nimbelo, *(Sng 110:4)*  
nimu.

**22** Aku tepa nimumunga Goteni lino kinye tembo nimbe ee nili ungumu Jisas aku ungumu paimbo Itemo enge tipili nimbe tirimuna moromo. Jisas lino kinye Gotenga tembo nimbe ee nili ungumu terimu aku olando, oi ee nili ungumu maindo.

**23** Oi popo tondoli iye awinima moloringi nalo molko kau naa puringi. Koloringi wali talape koinjo kolo wangoringi,

**24** nalo Jisas waliwalima koinjo molopa kau purumona yu kamukumu popo tondoli iyemu moromo. Akumunga waliwalima popo tondoli kongonomu tiye naa kolopa, tepa kau pumbelo, iye teni yu manda kolo naa wangombalo.

**25** Akumunga waliwalima koinjo molopa kau pumbelie Goteni eno lipe tapondopili nimbe waliwalima konge tepe moromomunga imbo mareni ningolio paimbo Jisas na tepe ltimu ningi ipuki tiko yunge imbi leko konge tekolio Gote moromona nondoko purumele imbo akuma yuni waliwalima manda lipe tapondoromo.

**26** Popo tondoli iye nomi awili olando aku teli teni linonga nimbe tenderemo mele paa manda tendepa moromo. Yu Goteni kanopa iye paa kake teli nimbe karomo iyemu molopa, ulu te tepe naa kenjipe, ulu keri te teambo konopu naa lepa Gote yunu mulu kombuna paa olando moromona molopili nimbe mondopa ulu alowa tendelimanga yu paa tule tepe moromo.

**27** Oi popo tondoli iye nomi awili olandomani teringi mele walimanga takiraki melema kalko popo tongeindo oi enonga ulu pulu kerima mainye pupili ningi melema popo toko kalkolio, pele imbomanga ulu pulu kerima mainye pupili

ningo melema popo toko kalondoringi, nalo Jisasini aku tepe naa terimu. Yu yunu wali tendeku wali kau Gote popo topa yunge kangimu tirimu aku tepe imbomanga ulu pulu kerima kamukumu mainye pupili nimbe imbomani yu toko kondangei nimbe tiye kolopa Gotenga nimbe yunu wali tendeku wali kau tirimu.

<sup>28</sup> Aku nio ungumunga ungu te altopo ka-mukumu nembo, Mosesinga ungu mane teni enge naa peli mai kombu iyema kanopa lipe popo tondoli iye nomi awili olandoma molangei nimo nalo Goteni Malondo nu popo tondoli iye nomi awili olandomu molani nimbe paimbo nio nimbe panjipe mi lerimu ungu akumu pele wendo orumu. Kano Malo aku kongonomu ara tipelie molopa kau pumbelo.

## 8

*Goteni ungu koinjo te nimbe panjipe mi lerimungu Jisas mulu kombuna popo tondoli iye kiyendomu moromomunga ungumu*

<sup>1</sup> Nani Goteni kanopa lipe linonga popo tondoli iyemu molopili nimu nio akumunga ungu pulumu i tepe, iye nindu kano teli te linonga popo tondoli iye kiyendo moromo kanomu mulu kombuna Iye Nomi King Awili Olandomunga polomunga imbo kindo pumbe moromo.

<sup>2</sup> Akuna molopa yu mulu kombuna angimo ulkemunga kiripi paa kake telimunga linonga nimbe Gote popo tondopa moromo. Yuaku kongonomu tendepa moromo ulke akumu Gote moromo ulke paimbomu. Akumu iye teni naa takorumu, Awilimu yunu takorumu.

<sup>3</sup> Gote popo tondoli iye nomi awili olando-mani Mosesini tirimu ungu manemuni nimu mele pilkolio tengiendo Gote kapi ningi we melema kinye kongi sipsip kalolima kinye meko ongo tiringi, akumunga iye Gote popo tondoli iye nomi awili olando pele orumu iye Jisas nio akumuni kape Gote kapi nimbe mele te mepa ombo tirimu.

<sup>4</sup> Nalo mai kombuna Gote popo tondoli iye ungu manemuni nimo mele pilkolio Gote melema kalko tirimele iyema we moromele akumunga kano iyemu yu mai kombuna molkanje Gote popo ton-doli iye te naa molka.

<sup>5</sup> Kano iyemani popo tondoli kongono teremele akumu Gote moromo mulu kombuna teremo kongonoma manda lepa, mulu kombumunga minimu mele manda leko moromele. Aku teko teremelemunga Gote maina molombalo selulkemu Mosesini kokele takombai terimu kinye Goteni yu mane tipelie nimbeindo,

Nani Mulu Sainai ola Moses nu lipo ondondu  
aku tepa mele melema pali paa tumbi tiko  
manda leko teami, (Kis 25:40)

nimu.

<sup>6</sup> Aku paimbo, nalo kano iyemanga Gote popo tondoli kongonomu paa mandopa. Goteni Jisasindo tewi nimbe tirimu popo tondoli kongonomu paa penga olandopa. Aku tepa mele nanga imboma kinye tembo nimbe ee nili ungu oi nimbe panjirimumu aku mandopa. Goteni lino kinye tembo nimbe ee nili ungu koinjo nimbe panjipe mi lerimumu enge timbei Jisas tuku tingina angilipe Gote kinye lino kinye popo tiko molangei nimbe lipe tapondoromo iyemuni kamukumu wendo

opili nimbe tenderimu, aku ee nili ungu koinjomu olandopa. Ungu koinjomuni lino kinye tembo nimbe panjirimo aku uluma olandopa, tembo nimbe ungu oi nimbe panjirimumuni nimu aku uluma mainyendopa, akumunga ee nili ungu koinjomu olandopa.

*Goteni ungu koinjo nimbe panjipe mi lerimu ungumu olando, ungu oi nimbe panjipe mi lerimu ungumu mainyendo*

<sup>7</sup> Pileio! Goteni nimbe panjipe mi llerimu ungu oimunga engemu pelkanje Goteni altopa ungu te naa nimbe panjilka.

<sup>8</sup> Nalo imbomani teringi ulu Goteni kanopa keri pilipelie nimbei,

Na Gote Awilimuni enondo nimboi,

“Pileio! Nani Israel imboma kinye Juda imboma kinye ungu koinjo te tembo nimbo ee nimbo panjipo mi lemboi waimu limbo.

<sup>9</sup> I ungu koinjo nio akumu oi enonga lanieli kole-nale kombu Isip wendo lipo mepo oru wal-imunga

kano imboma kinye nimbo panjipo mi lero mele tendeku tipe molo.

Nani eno kinye ungu nimbo panjipo mi lero ungumu naa pileringimunga nani eno molko kenjingei nimbo lipo umbulu tiru.

<sup>10</sup> Aku wali pele, Israeleni kalopa ltimu imboma kinye tembo nimbo ungu koinjo te nimbo panjipo mi lembo, akumu i tepa,

Nani eno kanopo penga pilimbo niu mele konopuni pilko kondangei nimbo nanga

ungu manema enonga konopuna pepili  
panjindipo,  
nanga ungu manema konopu mondoko pilipo  
teamili ningololangei nimbo  
nani kano ungu manema buk mele enonga konop-  
una imbi tombo.  
Na enonga Gote molombo. Eno nanga imboma  
molonge.

**11** Aku waimu wendo ombalo wali imbo kamako  
imbi molombaloma kape,  
koropa imbi naa molombaloma kape, akumani  
pali na Awilimu ningololangei imbi ting-  
munga imbomani enonga angenupili kinye  
kopu teko moromele imboma kape Aw-  
ilimu moromo mele pilengei naa ninge.  
Eno pali na liko manjiko molongemunga altoko  
ungu aku tepa ningololangei naa tinge.

**12** Nani eno kondo kolopo enoni teko kenjingue  
uluma tiye kolopo enonga ulu pulu kerima  
altopo paa naa pilimbo nimbo,” nio. *(Jer  
31:31-34)*

**13** Goteni pele lino kinye tembo nimbe pan-  
jipe mi lerimu ungu akumu ee nili ungu koin-  
jomu nimu ungu akumuni oi Israel imboma kinye  
nimbe panjipe mi lerimu ungu oi akumu yuni ka-  
mukumu nondopa mainye pumbei teremo nimbe  
nimu. Mele oimu pora nimbei teremo akumu  
paimbo nondopa kamukumu pora nimbelo.

## 9

*Oi maina Gote popo tondoli iye kiyendomani sel  
ulkena ari tirimelema kinye kerama kinye poinyena*

*langima kape meko pungo Gote tiringimunga ungumu*

<sup>1</sup> Oi Goteni Israel imboma kinye nimbe panjipe mi lerimu ungumuni Gote popo toko kapi ninge mele nimu ungu manema perimu. Kano ungu oimunga Gote popo toringi ulke te maina angilerimu.

<sup>2</sup> Aku ulkemu sel ulke te takoringi, akuna tukundo kiripi talo lerimu. Takokolio, kiripi kiyendo lerimuna kandel amboromo melemu kinye bret kaloli Gotenga ningi noiringi polomu kinye noiringi, aku kiripimu imbi leko Kiripi Kake Telimu ningi.

<sup>3</sup> Anjikondo maminye awili tule teni pipi tirimu akuna anjikondo Kiripi Paa Kake Telimu lerimu.

<sup>4</sup> Gote popo tongueindo mele mune tolima kaloringi alta polo kou gol kandoringimu kinye ket kou gol kandoringimu kinye aku mele talo aku kiripina lerimu. Aku ketena Goteni Israel imboma kinye tembo nimbe mi lerimu ungumu ltemona kanangei nimbe lipe ondorumu melema lerimu. Aku ketena tukundo langi mana perimu mingi te kinye Arononga tu ambolorumu kirikiri terimu kano tumu kinye Goteni Israel imboma kinye nimbe panjipe torumu unguma perimu kou talo akuma aku ketena tukundo lerimu.

<sup>5</sup> Aku ketemunga pipina ola muluna ensel au tiko mondoli talo kongo taloni pipimu ola oko poloringili pipi akuna meme ondoko Goteni imboma kondo kolopa enonga ulu pulu kerima tiye kolondorumu ningi. Nalo kinye wai te naa pere-momunga aku melemanga puluma waye manda naa nimbo.

**6** Melema aku teko wamoringi kinye popo toli iyema wali walima kiyendo kiripina pungo enonga kongono teko popo toringi.

**7** Nalo popo tondoli iye kiyendomu kau anjikondo kiripi lerimuna tukundo purumu. Wali wali naa purumu. Poinye yaka nimbe wali tendeku wali kau purumu. We naa purumu. Kongi sipsip te topalie meme mare mepa tukundo pumbelie yunge ulu pulu keri terimuma kinye imbonani ulu pulu keri naa liko manjiko teringima kinye aku mememu Gote popo topa tirimu.

**8** Aku ulumu manda lepa Mini Kake Telimuni aku oi Gote popo toringi sel ulkemu we angilipili Gote moromona manda pumolo aulke te wendo naa orumu nimbe lipe ondorumu.

**9** Kano sel ulkena ulu teringimani kinye tembaloo uluma manda leko teringi mele i tepa. Oi waliwalima Gote popo toko melema we tiko ari tirimelema kalko tiringi akumanii Gote aku teko popo toringi imbomanga konopu wango naa nimu.

**10** Oi Gote popo toringi ungu manemani langi nongo, no nongo, kimbo ki kangima kulumie tonge aku uluma kau mane tiringi. Goteni imbonaaku mi lepa nimbei tirimu unguma lombilko purumele nalo melema waye tepa amenge teremo wali aku kangindo kau ningi uluma pora timbelo.

*Akuna Kraistini Yunge mememu ondopa yunu  
Gote tirimu*

**11** Oi aku teringi nalo kinye Kraistini Gote popo tondoli iye kiyendomu omiba molopalie Goteni mele pengama timbo nimu melema yuni mepa

wendo oromo. Aku tepalie imbomani takoringi mai kombuna angimo sel ulkemunga tukundo naa purumu. Yupe Gotenga ulke wengendeli mulu kombuna ltemomunga purumu. Aku ulke paa olandopa paa ulke tukumemu.

<sup>12</sup> Yu Gotenga mulu kombuna angimo kiripi paa kake telina kamukumu wali tendeku wali tukundo purumu. Nalo akuna pumbeindo oi maina mulu sel ulkemunga tuku pungeindo teringi ulu yu naa terimu. Enoni kongi meme kinye kongi kao walo kinye toko yokoli akuma Gotenga kumbekerena meko puringi mele aku tepe naa terimu, molo. Yunge mememu kau yunu meli pumbe wali tendeku wali kau Gote popo topa tirimu. Aku terimu ulumuni lino ulu pulu keri pali konopuna pepili mindili nolemala aulkena wendo lipe Gote kinye kamukumu kopu tepo molopo kau pamili nimbe tepe ltimu.

<sup>13</sup> Goteni imbo kanopa kangimanga kalaro molopili moromele nimbe karomo imboma yuni kanopa kake tepili molonge nimbe kanopili ningolio ningimuni, oi kongi yokolima kinye kao peleama kinye toko yokolima kolko, kongi kao amboi kondoli, walo oi naa leli te toko tipena nomba pora tipili ningo kaloringi kinye norumu kekuma liko, yokolima tukundo ondoko munduko noikolio, kano imbomanga kangimanga pupe lteko toko munduringi kinye kano imboma altopa kanoramu kinye kangindo imbo kake telima nimbe kanoramu kala Gote kinye altoko kopu teko moloringi.

<sup>14</sup> Nalo Kraistingu mememuni oi teringi ulu pange tenderemo. Kraist yu ulu alowa te naa ter-

imu. Aku molo. Mini Kake Teli Koinjo Mololi enge nimumuni Kraist yu yunu Gote popo topa tirimu. Aku iyemunga mememuni linonga kangindo kau kulumie naa tondoromo. Aku molo. Linonga ulu kerima kulumie torumuna Gotenga kumbekerena lino Imbo Kake Telima moromolo lipo manjirimolo. Aku tepa kulumie torumumunga lino oi ungu mane enge naa peremomu naa lombieili. Molopa Kau Puli Gotenga teaio nimu ungumu teamili.

*Kraistinga mememuni Goteni nimbe panjipe mi lerimu ungu koinjomu kamukumu enge pepili nimu ungumu*

<sup>15</sup> Jisasinga mememuni lino Gotenga kumbekerena tepa kake tenderimumunga Jisas yu Gotenga tembo nimbe mi leli ungu koinjomu enge tirimuna yu imunana iyemu moromo. Oi ungu manemu we lepili ulu keri teringi imboma wendo limbei kolorumu. Aku tepa kolorumumunga Goteni imboma waio nimbe alako torumu ungumu pilko lombilenge imboma pali molko kondoko molko kau punge. Aku ulumu Goteni yunge bakuluma timbo nimbe oi nimu.

<sup>16</sup> Iye teni yu kolombai yunge nini melema moke tembai narini limbelo akumu nimbe para tipe pipiana toromo. Nalo bakuluman i kano melema we manda naa limele. Pele lapa kolomo ningi imbomani kanokolio manda, kinye lapani moke tepa noindirimo melema liengei nimele.

<sup>17</sup> Iye teni ungu nimbe panjirimo iyemu we moromo wali yunge ungu nimbe panjirimomu ulure manda naa teremo, we ltemo. Iyemu kolombalo

wali nini ungu nimbe panjirimu mele aku teko manda melema linge.

**18** Aku tepala kongi te toko yokolima ondoko teringi ulumuni oi nimbe panjirimu ungu manemu enge tingei teringi.

**19** I teko mele teringi: Mosesini oi imboma pilengei nimbe Gotenga ungu manema pali nimbe tipelie kongi kao walo mare kinye kongi yokoli mare kinye topa yokolima mingina kolopa, no kinye topele mapele topalie, unjo kelo isop kola te lipe sipsip indi kondoli mareni ka topalie, yokolima tuku mundupe wendo lipelie Goteni tirimu ungu manema molorumu bukuna kinye imbomanga kangina kinye pupe lteko topa mundurumu.

**20** Aku ulu tepalie nimbei, yokoli imu Goteni eno kinye ungu nimbe panjipe mi lerimu ungumu pilko tengen tiko molangei nimomu eno kinye wendo ombai enge tipili nimo yokolimu nimu.

**21** Aku tepe mele Gote popo toko kaloringi sel ulkemu kinye sel ulkena tukundo Gote popo tongueindo noirangi melema kinye pali Mosesini yokolimu pupe lteko topa kandorumu.

**22** Oi ungu manemu nimbe molorumu mele i tepe: Mele awini Goteni kanopa mele kake telima nimbe kanopili nimbe yokolimani kau manda tendembalo. Kongi kera kape te toko kondokolio yokoli naa ondunge lemo aku Goteni imbomanga ulu pulu kerima naa kandepea tepe ltendembalo.

*Imbomanga ulu pulu kerima Goteni tiye kolondopili nimbe Kraist Yu Yunu Gote popo topa tirimu ungumu*

<sup>23</sup> Gote popo toli sel ulkena lerimu melema muluna ltemo melema manda lepa lerimu. Mele akuma Gotenga kumbekerena kake tepili ningokongi kerama tokolio yokolima liko tanda tiko kandoringi. Nalo mulu kombuna ltemo melema kake tepili ningoi teringi ulu maindo munduko meme enge nili olandomuni manda tengen.

<sup>24</sup> Kraist kolopa makilipe koinjo molopalie ya maina Gotenga kiripi kake teli kini wamoko muluna ltemo ulke manda leko teringina tukundo naa purumu. Aku molo. Yu mulu kombuna tumbi tipe purumu. Akuna lino tapombai Gotenga kumbekerena pumbe moromo.

<sup>25</sup> Poinyemanga yaka nimbe popo toli iye kiyendomuni kongi kera manga yokolima lipe kiripi paa kake telina pumbe popo topa tirimu. Nalo Jisasini poinye yaka nimbe aku ulu naa terimu. Wali tendeku wali kau Gotenga mulu kombuna tuku pumbe yu yunu tirimu.

<sup>26</sup> Kraistini poinye yaka nimbe aku ulu telkanje poinyemanga yaka nimbe yu mindili nolka. Mulu mai talo Goteni terimu wali akuna mindili nombalie nolipe ombo kinye i wali olka. Nalo aku ulu naa terimu. Kinye peyalime waimu nondopo oromona Kraist Goteni imbomanga ulu kerima kulumie topa tiye kolopili nimbe ya i mai kombuna wali tendeku wali kau ombo yu yunu popo topa Gote tirimu.

<sup>27</sup> Imboma pali ya maina wali tendeku wali kau kolkolio altopa kot tendepa pilimbelo kombuna punge ulu pulumu peremo.

<sup>28</sup> Aku tepa mele imbomanga ulu pulu kerimanga umbuni mepa wendo limbei Kraist yu

yunu Gote popo topa tirimu. Altopa talo tepa ombalo aku wali ulu pulu kerima wendo limbei naa ombalo. Imbo yu nokoko moromelema tukundo limbei ombalo.

**Kraistini Linonga Nimbe  
Kamukumu Gote Popo  
Tondombaindo Wali Tendeku  
Wali Kau Yu Yunu Gote Tirimu  
Kinye Ari Tirimelema Kalko  
Tiringi Uluma Kamukumu  
Mainye Purumu Ungumu**

## 10

*Oi Gote popo toko kalko tiringi melemani ulu pulu kerima manda naa wendo lipe ltenderimu ungumu*

<sup>1</sup> Mosesinga ungu manemu i tepo kanamili ulu pengamu altopa ombalomunga oi mini mele kandomolo. Nalo lino naa wamba lipe ondorumu. Aku ungu manemuni poinyemanga yaka nimbe wali wali Gote kano teko kau popo toko tieio nimu. Akumunga ungu manemuni imboma aku teko Gote popo tongei ulke oringga kamukumu molko kondangei manda naa tepa tumbi tirimu lipo manjirimolo.

<sup>2</sup> Aku teko teringi ulumani enonga konopuma kamukumu kulumie tondolkanje altoko ari tirimelema toko naa kalemala. Kamukumu kulumie tolkanje wali tendeku wali Gote popo toko kalkolio, enonga ulu pulu kerima mainye pulka, kano kinye konopundo umbuni te naa pepa, ulu pulu

kerima we naa peremomunga mongo naa limolo  
ningo pilkolio altoko ari tirimele mare naa kalko  
aku uluma tiye kolemala.

**3-4** Nalo kongi kao peleama kinye kongi  
memema kinye toko kaloringimanga mememani  
enonga ulu pulu kerima kamukumu kulumie  
manda naa tondorumumunga waliwalima ipo  
leli tangoli poinyemanga pali Gote altoko kongi  
aku tepama kaloliko pungolio Gotenga ungu  
manema pule toringimunga enonga konopuna  
ulu pulu kerima we pepa kau purumu mele kelko  
liko manjiringi.

**5** Akumunga Kraist mai kombuna ombai tepalie  
nimbei,

Ari tirimelema toko nu kalko tiringima kinye mele  
nu we tiringi melema konopu naa mon-  
dokolio nuni na imbo kangi te tumbi tiko  
noikolio tirinu.

**6** Popo toko tipena nopili ningko kaloringi ari tir-  
imelema kinye, ulu pulu keri teremolo-  
manga kalopo tirimolo ningko kaloringi ari  
tirimelema kinye akuma nu konopu naa  
mondorono.

**7** Akumunga nani nimboi, “Gote, na i moro.  
Nuni nando teani puwi ninu mele teambo  
nimbo nanga kangimu imbomanga nimbo  
nu popo topo tipo omboi tero. Nani aku  
tepo tembo mele oi bukuna toringina mo-  
romo kanomu nio,” *(Sng 40:6-8)*

nimu.

**8** Paimbo Goteni yunu imbomando teaio nimbe  
ungu mane tirimu mele pilkolio tengindo ari

tirimelema kalko yu tiringi nalo Kraistini nimu mele nio aku ungumunga oi Kraistini nimbei, “Ari tirimelema toko nu kalko tiringima kinye mele nu we tiringi melema kinye tipena nopili ningko kaloringi kongima kinye ulu pulu keri konopuna peremomanga kalopo tirimolo ningko kaloringi kongima kinye, akuma kanokolio nu konopu naa mondorono,” nimu.

<sup>9</sup> Altopa nimbei, “Na i moro, nuni nando teani puwi ninu mele teambo nimbo omboi tero,” nimu. Aku tepalie yu oi popo tongeindo ari tirimelema kaloringi ulu pulumu topa mainye mundupe, yunu Gotendo tirimu ulu aku mele ulu pulu koinjo terimu.

<sup>10</sup> Goteni yundo tewi nimu ulumu pilipe lipelie Jisas Kraistini teambo nimbe ombo yunge kangimu wali tendeku wali kau yunu kamukumu Gote popo topa tirimumunga Goteni kanopa konopu tipelie linonga ulu pulu kerima tiye kolondopa lino yunge imbo kake telima molangei nimu.

*Kraistini Gote popo topa tirimu melemuni  
ulu pulu kerima paa manda kulumie tondoromo  
ungumu*

<sup>11</sup> Walimanga pali Gote popo tondoli iyema ola angilko popo tondoli kongono tepundala teringi. Paa waliwalima ipuleli tangoli ola angilko ulu pulu kerima paa manda naa kulumie tondopili ari tirimelema toko kaloringi.

<sup>12</sup> Nalo Kraistini imbomanga ulu pulu kerima wendo limbei wali tendeku wali Gotendo

yunu tirimu kinye manda terimu kolo we molorumu. Yuaku tepea pora tipelie Gotenga imbo kindo pumbe molorumu.

<sup>13</sup> Akuna molorumu kinye yandopa Goteni Jisas yunge opa pulema kamukumu topa mainye mundumbelo walimu wendo ombalomunga we nokopa moromo.

<sup>14</sup> Yuni aku oi kulumie tondorumu imbo akuma Gotenga imbo tukumema molangei nimbe yunu yunge meme wali tendeku wali ondopa kolorumu aku ulumuni imbo kanoma paa molko kondoko molko kau punge.

<sup>15</sup> Oi Mini Kake Telimuni linondo ungu aku tepe enge tipe nimbei,

<sup>16</sup> Awilimuni nimbei, “Aku wali pele imboma kinye tembo nimbo mi lepo ungu koinjomu aku i tepe, ‘Nanga ungu mane imbomanga konopundo panjindipo aku ungumu enonga konopuna lepa pupili,’ nimbo topo panjindimbo.” (*Jer 31:33*)

<sup>17</sup> Aku tepe nimbeline ungu te kape nimbei, Enonga ulu pulu kerima tiye kolopo altopo naa lipo manjimbo, (*Jer 31:34*)

nimu.

<sup>18</sup> Akumunga Goteni imbomanga ulu pulu kerima kamukumu kandepea tepe ltendemo lemo linonga ulu pulu kerima tiye kolopili nimbo ari tirimelema topo kalomolo kongonomu altopo naa temolo.

*Kraistinga uluma teremolo mele kau tepe molopolio tiye naa kolomolo ungumu*

<sup>19</sup> Ango kame, Jisas yunge mememuni linonga ulu pulu kerima kandepea tepe

Itenderimumunga linoni Gotenga Kiripi Paa Kake Telimunga pipili naa kolopo manda tuku pumolo.

<sup>20</sup> Lino koinjo molamili nimbe aulke koinjo Jisasini akiririmumunga linoni Kiripi Paa Kake Telina manda tuku pumolo. Aku aulke koinjomu maminye awilimuni ulke kerepulu kake telimu nambu tirimumunga tukundo pumbelie Jisasini akirindirimu. Aku maminye awilimu yunge kangi mele.

<sup>21</sup> Linonga Popo Toli Iye Awilimu yuni Gotenga imbo wayema tapu teremo.

<sup>22</sup> Jisasinga mememuni linonga ulu kerima kandepea tenderimu. Aku ulu kerima linonga konopuna pepa umbuni tirimuna uluma we lipo manjirimoloma yuni aku uluma kape kandepea tepe Itenderimu. No kake telimuni linonga kangima kulumie tondorumu. Akumunga linonga konopu toya topili ipuki tipo Gote moromona nondopo pamili.

<sup>23</sup> Eno kinye tembo nimbe panjirimu iyemuni kolo naa topa tembo nimo mele paimbo tembalo kani eno yu lino kinye tepo kondombo nimbe panjirimu mele paimbo tembalo ningoi enge ningoi ipuki tiringi mele tiye naa kolko, ambolko kondokolio yu paimbo ombo tembalo ningoi konopu tiko nokoko molaio.

<sup>24</sup> Konopu manjiko Gotenga imboma ulu penga teko konopu mondangei ulu nendo yando teangei makinjeio.

<sup>25</sup> Kristen imbo mare angenupili kinye liko maku naa toko tuku naa moromele aku ulu naa teaio. Kraist ombalo waimu nondopa oromomunga lino Gotenga imboma nendo yando enge

nimbo tepo imbo marenga konopu toimbo topili  
enge tiemili.

*Gotenga Malo ungu taka paa naa tondamili  
ungumu*

<sup>26</sup> Pileio. Linoni Kraistinguungumu pilipolio ulu kerima teamili konopu timolo lemo ari tirimelema kalko popo toli ulu teni aku ulu kerima manda naa kandepea tepa ltendembalo. Aku molo.

<sup>27</sup> Aku tepo temolo lemo kot awili wendo omba Gotenga opa pule imboma tipeni nombai nomba peremo aku ulumu lino pipili kolopo nokopo moromolo.

<sup>28</sup> Imbo teni Mosesini ungu mane tirimuma topa tangondorumu wali iye taloni molo yupokoni kanokolio ningotiringi kinye yu kondo naa kolko tumbi tiko kamukumu toko kondoringi.

<sup>29</sup> Oi paimbo teko kenjiringi imboma aku teko mindili tiringi lemo imbo teni Gotenga Malo yu ulure molo nimbe tiye kolopa ungu taka tondopa, Goteni ungu koinjo nimbe panjipe mi lerimu ungumu Kraistinguungumi mememuni enge tirimu meme akumuni kano imbomu Gotenga imbo konopu kake telimu molopili nimu aku mememu ulure molo nimbe ungu taka tondopa, Goteni lino konopu mondopa lipe tapondoromo mele lipe ondoromo Mini Kake Telimu ungu taka tondoromo imbo akumu paimbo olandopa mindili nombalo molo we moromo konopu ltemeleya? Paa mindili nombalo.

<sup>30</sup> Aku ambe telka, lino ungu nimbe panjirimu iyemu lipo manjirimolo. Akumuni nimbei,

Teko kenjirimelemanga pundu toli kongonomu  
 nanga kongonomu. Nanu kau pundu topo  
 eno mindili timbo,(Lo 32:35)  
 nimbeline ungu te peya nimbei,  
 Awilimuni yunge imbomanga kotemu yunu ten-  
 depa kot pilimbelo,(Lo  
 32:36)  
 nimbe aku ungumu moromo.

<sup>31</sup> Waliwalima molopa kau puli Gote paa enge nili  
 olandopamuni imbo tendo mumindili kolopalie  
 mindili nani nimbelo lemo paimbo yu paa mini  
 wale ltembalo.

### *Lino paa ipuki tiko molamili ungumu*

<sup>32</sup> Eno oi Gotenga ungumu pulu polko pilkolio  
 pilko ltingi kinye teringi mele altoko liko manjeio.  
 Eno mindili tiringi wali we mindili nongo enge  
 ningi molko Gote tiye naa koloringi.

<sup>33</sup> Wali marenga eno liko imbomanga kumbe  
 kerena anjiko eno ungu taka tondoko mindili  
 nangei ningi. Wali mare aku teko mindili noringi  
 imboma eno kinye tapu toko molko liko tapon-  
 doringi.

<sup>34</sup> Ka tiringi ka ulkena peringi imboma enoni  
 kondo koloringi. Enonga mele paa penga waliwal-  
 ima lepa kau pumbe melema mulu kombuna we  
 ltemo, ningi pilkolio enonga melema ltingi wali  
 eno liengei ningi tono kolko tiye koloringi.

<sup>35</sup> Oi aku teko teringi mele altoko pilkolio  
 paimbo lipe tapondoromo. Paimbo aku tepo  
 molomolo, ningi enge ningi ipuki tiringi mele  
 kinye tiye naa kolangei. Enge ningi ipuki tiko  
 molonge wali akumunga mele penga timbelona  
 eno awili teko linge.

<sup>36-38</sup> Tiye naa kolangei nimbe ungu te pere-momu i tepa,

Wali koltalo kau omba pumbelo kano kinye ombo nimu iyemu paimbo ombalo.

Yu walitikale ombalo. Nani imbo tumbi nilima nimbo karo imboma nani nimbo moro mele paimbo ningi ipuki tirimelemunga koinjo molko kau punge.

Nalo na ipuki tirimele ulu tiye kolonge lemo nani eno kinye konopu naa timbo, (*Hab 2:3-4*) nimbe aku tepa moromo. Akumunga Goteni lino teaio nimo mele temolo kinye yuni timbo nimbe panjirimu mele pengama limolo ningi pilkolio ipuki tirimele mele tiye naa kolko, aku teko molaio.

<sup>39</sup> Nalo lino imbo tiye kolkolio kombu kerina purumele imbomanga imboma naa moromolo. Aku molo. Lino paimbo nimbo ipuki tipolio mini pali koinjo molopa kau puli ulu pulumu limolo imboma moromolo.

## **Goteni Nimo Mele Linoni Paimbo Nimbo Pilipolio Enge Nimbo Molamili Ungumu**

# 11

### *Ipuki tirimolomunga ungu pulumu*

<sup>1</sup> Gote paimbo nimbo ipuki tirimolo nio aku enge nimbe ipuki tilimunga ungu pulumu i tepa, Goteni lino timbo nimbe panjirimu melema paa limolo nimbo ipuki tipo nokopo moromolo. Melema mongoni naa karomolo nalo mele akuma paa ltemo nimbo ipuki tirimolo.

<sup>2</sup> Imbo oi moloringimani aku teko ningi ipuki tiringimunga Goteni eno kanopa penga pilipelite teko kondoromele nimu.

<sup>3</sup> Goteni nimo mele lino paimbo nimbo ipuki tirimolomunga Goteni mulu mai talo tembai wendo opili nimu ungumuni mulu mai talo wendo orumu nimbo lipo manjirimolo. Akumunga mele naa lerimu melemani Goteni lino karomolo melema paimbo terimu nimbo lipo manjirimolo.

*Abel kame Enok kame Noa kame Gote ipuki tiringi temane mare*

<sup>4</sup> Abeleni Goteni nimu mele paimbo nimbe ipuki tilipe molorumumunga Goteni kanopa penga pilerimu mele te Gote popo topa kalopa tirimu nalo Keineni Gote popo topa kalopa tirimu melema Goteni kanopa keri pilerimu. Abeleni Gote paimbo nimbe ipuki tirimumunga Goteni Abel iye tumbi nilimu nimbe imbi tirimu. Abel oi kolorumu nalo ipuki tipe ungu nimumuni kinye kape lino we nimo.

<sup>5</sup> Enokeni Goteni nimu mele paimbo nimbe ipuki tipe molorumumunga naa kolorumu. Yu koinjo molopili Goteni yu lipe mulu kombuna meli purumu. Goteni yu lipe meli purumu wali imbomani yu koroko naa kanoko ltingi. Goteni Enok oi lipe meli naa pupili Enokeni ulu terimuma Gote kanopa penga pilerimu, ungu aku tepa Gotenga bukuna moromo.

<sup>6</sup> Imbo teni Gote paimbo moromo konopu lepalie Gote kinye ambe tepo molombonje konopu kimbo tipelite, Gote yu lipe tapondombalo nimbe ipuki tipelite yunge kumbekerena manda pumbelo. Aku tepa naa nimbe pimo lemo paa manda

naa pumbelo. Akumunga Goteni nimo mele paimbo nimbe ipuki naa tipelie Goteni kanopa penga pilimbelo ulu mare manda naa tembalo.

<sup>7</sup> Noa Goteni nimu mele ipuki tipe molorumumunga Goteni yundo Maina umbuni te wendo opili nimboi tero nimu wali pilipelie, oi naa kanorumu nalo Noani Goteni paimbo nimo nimbe nona lembalo sip awili te takorumu. Akuna pungolio yunge ambo bakuluma kinye wai keri wendo orumumunga wendo lipe tepa ltimuna penga teko moloringi. Yuni Goteni nimu mele ipuki tipelie terimu ulumuni we maina moloringi imbomanga ulu kerima lipe ondorumu. Aku tepa Gote ipuki tirimumunga Goteni yu iye tumbi nilimu nimbe imbi tirimu.

### *Abraham Sara talo Gote ipuki tiringili ungumu*

<sup>8</sup> Abraham Goteni nimu mele ipuki tipe molorumumunga Goteni yundo nu morono kombumu tiye kolko altopo timbo kombuna puwi nimu ungu pilipelie kano kombu tulena lerimumunga oi naa kanorumu nalo ungumu pilipe lipe tengen tipe we purumu.

<sup>9</sup> Goteni nimu mele ipuki tirimumunga Goteni timbo nimbe panjirimu kombuna pumbelie iye ombo angililimu mele pumbe molorumu. Paimbo ulke te kamukumu naa takopa, sel ulke te takopa pelipe akuna Aisak kinye Jekop kinye molorumu. Aku lapumu Goteni nimbe panjipelie eno Timbo nimbe nimu maimu ltimele lapumu.

<sup>10</sup> Goteni yunu pilipelie ulke kombu tenga kamukumu angilimbelo ulkema takopa pora tirimu kombuna molombo nimbe pilipelie Abrahameni ipuki tipe nokopa molorumu.

<sup>11</sup> Abraham bakulu membai poinyema pora nimu, yunge ambo Sara wangono perimu, nalo Goteni nimu mele paimbo ningi ipuki tiko moloringilimunga Goteni elo enge tirimu kinye bakulu meringili. Goteni tembo nimbe panjirimo mele paimbo teremo, kolo naa toromo ningi ipuki tiringili.

<sup>12</sup> Akumunga iye te anda lepa iye kololi mele molorumu iyemu imbo paa awininga kolepa molorumu. Imbo kombukandiye mele molo kou ukiye mele kambu paa manda naa tonge imboma yuni kalopa ltimu.

<sup>13</sup> Kano iyemani Gote paimbo ningi ipuki tiko mololiko pungolio koloringi. Eno mai kombuna oi we molkolio Goteni timbo nimbe panjirimu melema oi naa ltingi. Pele paimbo limolo ningi konopuni pileringi akumu tule tepe lerimuna mongoni mele kanokolio limolo ningi konopu tiko molkolio imbo moloringi kinye pipili naa kolko lino ya i mai kombuna imbo ponenge lepo ombo angimolo ningi.

<sup>14</sup> Imbomani aku teko nimele kinye pilipolio enonga kamukumu molonge kombu te koroko kanoko lingeindo nimele nimbo lipo manjirimolo.

<sup>15</sup> Kombu tiye kolko oringi kombuna kelepo pumolo ningi pilimalanje eno kelko manda pulimala.

<sup>16</sup> Nalo molko oringi kombu akumu altoko konopu kimbo tiko naa molkolio kombu paa penga olando te lupe akuna pamilia ningi pileringi. Aku kombumu mulu kombumu. Aku-munga Goteni yu paimbo ningi ipuki tirimele imboma akuna molangei nimbe ulke kombu penga

te tepe wamopa terimu. Aku tepalie aku im-bomani Gotendo nu linonga Gote ningi ungumu pilipelie ungu kanomu mai naa kolorumu.

**17-18** Goteni Abrahameni tewi nimbo mele paimbo pilipe lipe tembalonje kanambo nimbe manda manjirimu kinye Abrahameni Goteni tembo nimu mele paimbo tembalo nimbe ipuki tipelie yunge malo Aisak Gote popo topa kalopa timbei terimu. Paimbo oi Goteni Abrahamendo nimbe panjipelite nimbeindo, “Nunge malo Aisakeni kalopa limbelo imboma kau nuni kalko lini nimbo, nimbo panjindu imboma molonge,” nimu nalo aku pilipe paimbo nimo, paimbo aku tepe tembalo nimbe pilipelie yunge malo tendekumu kau molorumumu aku ulu tembai terimu.

**19** Abrahameni konopuna pilipelie, Aisak kolombalo kinye Goteni yu manda makinjimbelo nimbe pilerimu kani linoni ungu manda lepolio i tepo nemili Abrahameni yunge marenu imbo ono kombuna wendo mele ltimu.

*Aisak kinye Jekop kinye Josep kame Gote ipuki tiringi ungu*

**20** Aisakeni Goteni nimu mele paimbo nimbe ipuki tipe molorumumunga Jekop kinye Iso talo mane ungu tipelie altopa elo kinye wendo ombalo ulu oi nimbe tirimu.

**21** Jekoponi Gote ipuki tipe molorumumunga kolombai tepalie yunge malo Joseponga malo talo mane ungu tipelie tu ambolopa pi polopa mai kanopa Gote kapi nimu.

**22** Joseponi Gote ipuki tipe molorumumunga yu nondopa kolombai tepalie yunge Israel imboma

eno altoko Isip kombu tiye kolko punge nimbe tirimu. Punge wali yunge ombele kinye tengei ungumu nimbe tirimu.

*Moses Gote ipuki tirimu ungumu*

<sup>23</sup> Mosesinga anumu lapa taloni Gote ipuki tiko moloringilimunga Moses mekolio yu oli yupoko lopeke teringili. Yu ungulu paa penga ningokanokolio Isip iye nomi kingimunga teao nimungumu umbulu tingilindo pipili naa koloringili.

<sup>24</sup> Moses Gote ipuki tipelie akopa awili lepalie wali Isip imbomanga king lemenunga malo naa nengei konopu lerimu.

<sup>25</sup> Ulu kerima lepa naa puli tono koromele ulu naa tembo konopu lepalie Gotenga imboma umbuni meremele mele aku tepo membo konopu lerimu.

<sup>26</sup> Yuni konopuna pilipelie Isip kombuna mele yakela teli pengama pali nanga noilkanje ulure molo nimbe pilipelie Goteni mele penga timbonimu melema altopa limbo nimbe pilipelie, Kraistinga imbo moromunga na teko mai kondonge lemo aku penga nimbe enge nimbe angilerimu.

<sup>27</sup> Moses Gote ipuki tipelie Isip tiye kolopa purumu wali Isip iye nomi kingimuni yu kinye mu-mindili kolorumumunga pipili kolopa kowa naa purumu. Imbomanzi Gote mongoni naa karomele nalo Moses Gote kanokolio teremele ulu mele tepalie enge nimbe angilerimu.

<sup>28</sup> Moses Gote ipuki tipelie Goteni Israel imboma penga teko molangei nimbuaku Pasova waina Israel imbomando kongi sipsip topolio yokolima ulke kere pulu malio wape tendamili nimbu. Aku

tenge wali topa kondombai ensel teni enonga ungulu komolayema naa ombo topa kondombalo nimu.

*Israel imbo awini Gote enge ningi ipuki tiringi ungumu*

<sup>29</sup> Israel imbomani Gote ipuki tiringimunga Nomu Kuta Kondoli kumbulupe maimu kapu lerimu kinye nekondo puringi. Nalo Isip iyemani Israel imboma lombili puringi kinye no wangoko koloringi.

<sup>30</sup> Israel imboma Gote ipuki tikolio Jeriko kombu kouni teli papemu wali kite yupoko pakera andoko makai tenderingi papemu ungu torumu.

<sup>31</sup> Wapera toli ambo Rahap Gote ipuki tipelie Israel iye taloni Jeriko imboma ambe tereme-ljenje ningi kanoko panjingili oringili kinye yuni elo lipe tapondorumumunga Israel imbomani Gotenga ungu naa pilko ltingi imboma ongo toringi wali yu naa toringi.

<sup>32</sup> Aku temane mele peya mare tamboya? Molo. Wai mare naa ltemo. Gideon kame Barak kame Samson kame Jepta kame Devit kame Samuel kame Goteni altopa tembalo uluma oi neio nimbe tirimu iyema eno kinye temane mare topo tilka nalo aku temanema topo timbo wai naa ltemo.

<sup>33</sup> Gote ipuki tiringimunga mareni iye nomi king marenga ami iyema kinye opa tekolio enoni nokoringi kombuma toko kaloringi. Mareni imboma molko kondangei ningi ulu tumbi nilima teko nokoringi. Mareni Goteni eno tepo kondombo nimbe panjirimu mele eno molangei paimbo ltingi. Mareni laiononga kerema pipi tiringi.

<sup>34</sup> Mareni tipe awili tepa norumumu toko kumunduringi. Mareni kowa puringi wali Goteni nokopili imbomani baineteni toko naa kondoringi. Mare oi enge te naa perimu nalo pele enge pepili moloringi. Mare opa tengindo paa iye enge ningo mindili telima molko, enonga opa pule ami iyema toko munduringi.

<sup>35</sup> Mare koloringima kelko makilko ola moloringi kinye anupilini eno koinjo moloringi kinye kelko ltingi. Nalo mare ka tiko mindili nongo kolangei ningo koipeni tokolio ningeindo, enoni Gotenga ungumu tiye kolomolo ninge kinye we pangei nimolo ningi nalo kolomolo lemo kelepo makilipo ola molopo, kamukumu paa koinjo molopo kondopo kau pumolo konopu lekolio enonga opa pulemani ningi ungumu naa pileringi.

<sup>36</sup> Mare ungu taka tondoko ka pulteni enge ningo toko, mare ka seneni ka toko ka ulkena panjiringi.

<sup>37</sup> Imbo mare kolangei ningo kouni toringi. Imbo mare koinjo molangei so\* liko imunana karu leko alowa teringi. Mare opa teli baineteni toko kondoringi. Mare ipuki tikolio wale pakoli molo lerimuna kongi sipsip molo mememanga kangima liko maminye mele pakoringima imbo-mani eno toko puringi. Melema molo lepa paa koropa pupili moloringi. Mare mindili noringi. Mare, imbomani teko kenjiringi.

<sup>38</sup> Mare imbo naa peli kombumanga kinye, mulu kembomanga kinye, kou angamanga kinye,

---

\* **11:37:** 'So' akumu unjo karu lepo kongono teremolomu.

mai angamanga kinye, pungo peliko andoringi. We mai kombuna moromele imbomani naa tele-mala ulumu Gote ipuki tiringi imbomani aku ulu teringi.

<sup>39</sup> Aku imboma Gote ipuki tiringina Gote kinye enonga imbi moromo. Nalo mai kombuna molko-lio Goteni tembo nimbe panjirimu ulu pengama naa ltingi.

<sup>40</sup> Aku ambe telka Goteni linonga ulu penga wendo opili wai oi panjirimu. Goteni lino kinye popo tiko eno molko kondangei nimu.

## 12

### *Lino Jisas kanopo ipuki tiemili ungumu*

<sup>1</sup> Oi imbo paa awini aku teko Gote ipuki tikolio teko kondoko moloringimunga aku tepo lino tepo kondamili mele liko ondoromele kani kanopo pilipolio pele kinye lino kape aku tepo mele pengama limilindo Goteni owe te panjirimu owe-munga lkiko pangei nimuna pilipolio paa lkiemili nimbo lino lipe naa tapondoromo ulu lupe lupema tiye kolopo, ulu pulu kerimani kape lino naa ambolopili nimbo tiye kolopo konopu enge nipili keru keru lipo lkiemili.

<sup>2</sup> Enge nimbo lkimilindo lino ipuki tirimolo ulu pulumunga pulu iye Jisas wambo kanolipo pamili. Linonga ipuki tirimolo ulumu yu manda tendembalo. Yu pilipelie, Goteni tewi nimo mele tepo kondombo kinye paa tono kolopo molopo kondombo nimbelie yu mindili nomba unjo polopeyana kolorumu. We imbomani unjo polopeyana koromele imboma aku imbo kerima

nimele nalo Jisas unjo polopeyana uku toko pan-jingeimunga pipili naa kolopa konopu awini lipe naa mundupelie akuna angilipe kolorumumunga kinye Gote kombu nokopa moromo polomunga imbo kindo yu pumbe Gote kinye moromo.

*Goteni lino umbuni tirimomu molopo kondamili nimbe tepa wamorumu*

<sup>3</sup> Lino tiye naa tepili ningi Jisasini terimu ulu wamongo pileio. Ulu pulu keri teli imbomani Jisas kinye mumindili kolko mindili tiringi kinye yu enge nimbe molorumu mele wamongo pilko molaio. Yuaku teko teringi kinye molorumu mele liko manjikolio eno paimbo konopu enge nipili molko, tamba naa ningi ipuki tirimele mele tiye naa kolaio.

<sup>4</sup> Paimbo, ulu pulu kerima teko maindo mundungei opa teremele nalo meme te oi naa oli.

<sup>5-6</sup> Gotenga bukuna moromo ungu teni eno enge ningi molangei nimbe eno yunge bakulumu nimbelie enondo nimu ungumu komu tindingeya? Aku ungumuni nimbei,

Nanga bakulumu, Awilimuni imbo konopu mondoromoma molko kondangei nimbe mindili tirimo.

Yunge bakulumu molangei nimo imbo akuma mapuni toromo.

Akumunga Awilimuni nanga ungumu pilipili nimbelie mindili timbelo kinye akumu ulure molo naa ningi,

yuni nu nimbe amenge tepa mane timbelo kinye umbuni awini naa kolani. *(Snd 3:11-12)*

<sup>7</sup> Goteni eno tepa wamopili enge ningó angileio. Gote eno nimbe amenge teremo aku ulumu Lapalini enonga bakulumá ningó amenge teremele mele. Bakulu te yunge lapani mane naa tirimo bakulu te moromoya? Molo.

<sup>8</sup> Bakulumá pali enonga lapalini molko kondangei ningó mapuni toko mane tirimele aku mele Goteni eno molko kondangei nimbe mindili naa timo lemo eno mepa Iteli bakulumá mele moromele, yunge bakulu tukumema naa moromele.

<sup>9</sup> Imu kape liko manjeio! Lino bakulumá molorumulu kinye linonga ya maina lapalini molko kondangei ningó mindili tiko mane tiringi kinye linoni enonga unguma lipo awili tipo taka lipo molopo paa teremele nimbo molorumulu. Aku lemo linonga minima kinye konopuma kinye nokoromo Lapamuni lino mane tirimona yu kinye molopo kondamili nimbo yunge unguma pilipo yu maindo molamili.

<sup>10</sup> Wali alaye kolo mele linonga lapalini lino molko kondangei ningolio enongano konopuni pilkolio mindili tiko mane tiringi, nalo Goteni pilipe kondopa lino tumbi tipe mane tirimo akumuni lino waliwalima paa lipe tapondoromo. Lino popo tipo kake telima molamili nimbeline aku teremo.

<sup>11</sup> Linonga lapalini molko kondangei ningolio lino mindili tirimele kinye konopu naa tipo moromolo. Mindili nombolio konopu keri kau panjipo moromolo. Nalo oi mane tirimele kinye pilipo lipolio pele ulu tumbi nilima tepo konopu u nipili taka lipo moromolo.

*Lino konopu enge tipo molamili nimu ungumu*

**12** Akumunga, enonga kima enge naa nimbe ongopa topa lemo lemo, kinye ki winjiko kongono teaio. Enonga kimboma kolomo lemo enge ningko kambuleio.

**13** Kimbo keri ltemo imboma enonga kimboma kamukumu keri naa liepili. Altopa penga liepili ningolio aulke toya tolina paio.

**14** Imboma kinye konopu tendekuna pupili taka liko molko kondongei uluma enge ningko teko molko, enonga konopuma kinye kangima pali Gotenga ningko Goteni kanopa kake teremo nimbe kanoromo uluma enge ningko teko molaio. Aku kake teli ulu naa tengen lemo Awilimu naa kanonge.

**15** Unjo te mongo kombili telima toromo aku mongo mele enonga imbo teni Goteni eno we kondo kolopalie lipe tapondorumu ulumu tiye kolopa molopa kenjimbelo kinye eno tepa mongo mongo kondopa eno tepa kenjimbelo. Aku ulu wendo naa opili ningko wamongo kanoko molaio.

**16** Imbo teni wapu ulu kerinali naa tepili. Oi Isoni Gote umbulu tirimu mele aku teko naa teaio. Iso lapani iye komomunga nimbe timbelo melema ulure molo nimbe langi walitikale nom-baimunga limbei aku mele pengama yolo ltimu.

**17** I nimboi ulu eno liko manjirimele. Iso yunge melema altopa limbei terimu nalo lapani molo nimu. Aku wali Iso mane ungu naa lipelie kola awini terimu nalo yu konopu alowa tembalo aulke naa lerimu.

*Jerusalem mulu kombuna ltemo akuna lino  
pumbo molomolo ungumu*

**18** Eno melema kanoko ambolongei kombuna wendo naa oli. Oi Israel imboma Sainai Muluna nondoko ongo tipe alimbili nomba tumbulu topa ipo lepa poporome awili toromona kanoringi.

**19** Akuna biukel te ungu nimbe iye teni ungu nimu imboma pilkolio mini lteko Mosesindo ningei lino altopo naa pilimolo ningi.

**20** Goteni i ungu nimuna pilkolio mini lteringi akumu i tepa: Imbo te molo kongi lopa te kape muluna nondopa pumbe olando pumbei tembaloo kinye kouni toko kondangei nimumunga aku ungu ningi.

**21** Neya aku uluma wendo orumu kanokolio mini lteringi uluma Moses yu pilipe kanopalie na kape mini ltepo pungu pungu nio, nimu.

**22** Eno aku tepa komburenga naa oringi. Aku molo. Eno Gote moromo mulu Saion oringga moromele. Akumu ulke kombu awili Jerusalem. Aku ulke kombu awilimu koinjo molopa kau puli Gote enge nilimu moromo mulu kombuna ltemo. Ensel kambu manda naa tolima tono kolko maku toko moromelena eno oringi.

**23** Akuna Gotenga imboma, enondo nanga bakulu komomu nimu imboma nombeya teko moromelena oringi. Kano imbomanga imbima mulu kombuna buk tengah moromo. Imbomanga pali kot pileli Gote moromona oringi. Goteni kanopa imbo tumbi nilima nimbe imbi tirimo imbo tukumema moromelena oringi.

**24** Goteni imboma tapombo nimbeline ungu koinjo nimumu enge tirimu iye Jisas moromona oringi. Aku ee nimbe mi lerimu ungu koinjomu enge timbei Jisasinga mememuni imbomanga

pupe lteko torumuna wendo oringi. Abelenga mememuni pundu topili nimu mele Jisasinga mememuni aku tepa naa nimo. Aku mememuni ulu penga wendo opili nimo.

*Gotenga ungumu naa pimolo ninge imboma mongo linge kani kanoko kondoko molaio nimu ungumu*

<sup>25</sup> Maina iyemuni koro oi ya mai kombuna moloringi imbomando ungu enge nili mare nimbe tipe lepi lepi torumu wali naa pilimolo ningi. Aku ulu teringimunga Goteni umbuni tirimu kinye eno kowa pungei aulke te naa lerimu. Aku lemo mulu kombuna orumu iyemuni ungu engema linondo yando nimbe tipe lepi lepi toromo wali naa pilimolo nimbo umbulu timolo lemo mindili timbelo kinye kowa pumolo aulke te lembaloya? Paa naa lembalo. Akumunga eno kinye nimo iyemu umbulu naa tieio.

<sup>26</sup> Koro oi Goteni nimu ungumuni mai parambala tenderimu, nalo kinye yuni ungu te nimbe panjipelie nimbei,

Altopo walite kamukumu parambala tepili nimbo akumu maimundo kau naa nimbo.

Mulu mai talo waye parambala tepili nimbo kinye tembalo, *(Hag 2:6)*  
nimu.

<sup>27</sup> Unku altopo walite kamukumu parambala tepili ungu nimumuni mulu mai talo tepe wamorrumuma pali kolo wangombalo lipe ondoromo. We lepa kau pumbelo melema kau lope lape naa telu we lepili nimbe Goteni oi lope lape tendeli melema pali wendo lipe ltendembalo.

**28-29** Akumunga Yu iye nomi kingimuni noko-romo kombumu parambala tepa pora naa nimbelo kombuna limolo kani Gote kinye paa tereno nemili. Tipeni melema nomba pora tirimo mele linonga Gote tipe mele moromo akumunga Goteni kanopa penga pimo uluma tepo pipili kolopo Yu iye paa awili olando enge pelimu nimbo yunge ungumu taka lipo pilipolio yunge imbi kape nemili.

## **Pipia Topa Tirimu Iyemuni Kamukumu Torumu Ungumu**

### 13

*Lino imbo te te nimboni imbo lupema konopu  
paa mondamili ungumu*

**1** Eno Kraistingu imboma nanga ango kame ningko konopu nendo yando mondoko molaio.

**2** Kombu tulena imbo ponenge mare onge kinye tiye naa kolko enonga ulkendo meko paio. Oi imbo mareni aku ulu teringi kinye we imbo mare nokoromolo konopu leringi nalo mulu kombuna enselema nokoringi.

**3** Kraistingu imbo ka ulkena peremelema eno we moromele imbomani lino eno kinye peya ka ulkena pelemala ningko pilkolio aku ka ulkena peremele imboma liko manjiko kondo kolaio. Opa pulemani enonga imbo mare teko kenjinge kinye eno we moromelemani opa pulemani lino aku teko teko kenjilimala ningko pilko aku opa pulemani teko kenjirimele imboma liko manjiko kondo kolaio.

<sup>4</sup> Ambo liko iye puli ulu pengamu. Gotenga kumbekerena kake tepa lepili ambo iyema enonga ambo liko iye purumelemu nokoko kondaio. Goteni i kano kano ulu teko apureli ambo iyema pundu kerimu tombo nimu ulu liko manjirimele.

<sup>5</sup> Eno kou monema kanoko kumu naa meaio. Goteni nimbei,  
Nani eno paa tiye naa kolombo. Nani enongano  
we molangei naa nimbo. Paa molo, *(Lo  
31:6)*

nimu.

<sup>6</sup> Akumunga linoni konopu toimbo topo i tepo nemili,  
Awilimuni na taporomomunga pipili naa kolombo. Imbomani na ulu te tengei teremele wali pipili naa kolombo. *(Sng  
118:6-7)*

*Lino oi nokoringi iyemanga ungumu taka lipo  
pilipo molopo, Jisas tiye naa kolamili ungumu*

<sup>7</sup> Eno Kraistingu imboma, eno oi nokoringi tapu iyemani oi pulu polko Gotenga ungu ningotiringi iyema liko manjeio. Kano iyema molko teko ipuki tiringi ulu liko manjikolio aku teringi mele teko molaio.

<sup>8</sup> Jisas Kraist tendeku tepa kau moromo. Oi molorumu. Kinye moromo, altopa kape waye aku tepa kau molombalo.

<sup>9</sup> Akumunga ungu lupe lupe ningemani enonga konopu mepa naa andopili neio. Aku ulu naa tepili neio. Eno Gote tiye kolonge kani. Goteni lino we kondo koromo ulumuni linonga konopuma tepa enge tirimo wali aku penga. Unku

manemuni i teko naio nimona langi nonge wali enonga konopu enge naa timbelo. Aku ulu teringi imboma kinye ulu tukume wendo naa oromo.

**10** Linonga alta polomu ltemo. Gotenga ulke tempelena popo toringi iyema linonga alta polona kere manda naa linge.

**11** Gote popo tondoli iye kiyendomuni Goteni imbomanga ulu pulu kerima kanopa tiye kolopili nimbe ari tirimele tengä yokolimu kolopa meli kiripi paa kake telina tuku mepa pumbe Gote popo topa tirimo, nalo aku ari tirmelemu mekolio imbo molko peringi kombumu tiye kolko tawendo pungo tipena nopili ningko kaloringi.

**12** Aku teko teremelemunga Jisas kape yunge mememuni Goteni imboma kanopa kake telima nimbe kanopili nimbe imbo molko peringi ulke kombumunga pape tawendo mindili norumu.

**13** Akumunga Jisas pape tawendo moromona lombili tawendo pumbo yu teko mai kondoringi mele lino kape yu peya teko mai kondangei kopu tepo molamili pamili.

**14** I tepo lipo manjipolio aku ulu teamili. Ya maina linonga kombu lepa kau pumbelo kombu te naa ltemo. Kombu te wendo ombalomu nokopo moromolo.

**15** Aku tepo nokopo moromolomunga Jisas konopu lipo manjipolio Gote waliwalima kapi nimbo molamili. Gote paa awili olandopamu nimbo yu kalko tirimele mele linonga keremani yu waliwalima kapi nemili.

**16** Gote mele te kalko tiemili ningolio i ulu teaio. Imboma tepo kondamili ningko liko tapondoko, mele molo lembalo imboma enonga mele mare

moke teko tieio. Gote kalko tiengei aku teko teremele uluma yuni kanopa penga pilipe konopu tirimo kani komu naa tindiko aku ulu teaio.

<sup>17</sup> Enonga nokoli iyemani teaio nimele mele pilko liko teko taka liko molaio. Aku iyemani pele Gote kongono teremolo mele nimbo timolo kinye teko kondoringi nipili ningi pilko eno molko kondangei ningi nokoromele. Akumunga enonga ninge unguma pilko liko, lino aku tepo kongono temolo kinye linonga nokoli iyema konopu tiko konopu umbuni naa pepili lino nokangei ningi enoni teaio ninge mele teko molaio. Enoni enonga nokoli iyemanga unguma pilko liko naa teko eno punge lemo nokoli iyema konopuna umbuni te pembalo akumuni eno manda naa lipe tapondombalo kani aku teaio.

*Goteni eno molko kondangei nipili nimu unguma*

<sup>18</sup> Goteni lino lipe tapondopili konge tendaio. Lino konopuni pilipolio ulu te tepo kenjirimolo nimbo naa pilipo, lino waliwalima toya topo andamili nimbo pilipo moromolomunga enoni aku teko Gote linonga konge tendenge kinye pilimbelo.

<sup>19</sup> Ungu te eno peya enge nimbo konge tero. Gote kinye ungu ningolio na eno moromelena paa nondopo altopo wamboi Goteni na lipe tapondopili ningi konge tendaio.

<sup>20</sup> Imboma tepa ame toromo Goteni linonga Awili Jisasinga meme aku yunge imboma kinye tembo nimbe lepa kau pupili ungu nimbe panjipe

mi lerimu ungumu enge tirimu mememunga engemuni Jisas yu lino yunge sipsipimanga tapu iye enge nilimu ono kombuna topa makinjirimu.

<sup>21</sup> Aku Goteni enoni yunge konopu mondoromo uluma manda tengei enge paa pengama tipili. Yunge konopuni pilipelie Jisas Kraist terimu ulumuni eno yunge konopu mondoromo uluma teremele imbo pengama tepa wamopili. Jisas Kraist waliwalima kapi nimbo imbi lipo ola mundemili. I paa.

### *Pipia topa pora timbei torumu ungumu*

<sup>22</sup> Ango kame, nani eno i pipia topo tiro akumu ungu kelo kolte kau enonga konopundo enge timboi toro kani tiye naa tepili wamongo pilko molaio nimbo enge nimbo konge tero.

<sup>23</sup> Nani eno pilengesi nimbo nio. Linonga angenu Timoti kinye ka ulkena we naa peremo, yu wendo munduringi. Yu na morona welea omo lemo ilto peya ombo eno kanombolo.

<sup>24</sup> Eno nokoromele iyema kinye Gotenga imboma pali kinye molko kondai nindeio. Kombu Itali imbo oringi moromelemani enondo molko kondai nimele.

<sup>25</sup> Goteni eno kinye konopu noipili.

**UNGU TUKUMEMU**  
**The New Testament in the Imbo Ungu Language of**  
**Papua New Guinea**  
**Nupela Testamen long tokples Imbo Ungu long Niugini**  
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 25 Aug 2024 from source files  
dated 31 Aug 2023

8e236e4f-bf7f-5fe1-a0ea-4f115d5cbf7e